

秋碧吟廬詩鈔
乙籤

特別
イ 4
3152
79



14
3152
79



95-139



廬 煉
詩 碧
鈔 吟



大正己未歲
桂華一月
晴却弄題



序

丁酉之秋予承乏第二高等學校同人語曰有天隨久保子者向游此校今在大學尤善詩詞恨不使君見之未數年天隨頻刊其新釋經則有論孟學庸子則有莊列荀韓又錄禹域歷代大事曰東洋通史予於是知其問學有素矣丁巳之冬託人寄其秋碧吟廬詩第一集繙而讀之古今長短諸體皆備其廣肆軼蕩如蘇秦坐華屋下抵掌掉舌談六國合從之計也其慷慨激越如荆軻高漸離擊筑燕市酣醉高歌旁若無人也其雄悍俊邁如項王瞋眼一叱樓煩目不能視手不能發也予

於是知其才藻無匹矣。夫詩之與問學，非二塗也。青蓮稱幼通五經，而讀書匡山又十九年。少陵云：讀書破萬卷，下筆如有神。漁洋曰：爲詩須博極群書。如十三經廿一史，次及唐宋小說，皆不可不看。所謂取材於選取法於唐者，未盡善也。今之作詩者，概不事諸公之所事，徒以譎陋空疎之學，求工於字句之間，輒曰：予宗李杜，予學吳王，皮之不存，毛將安傅。未有根柢淺而枝葉茂者，宜矣。其詩之不足觀也，當是之時，天隨賣文爲活，二十餘年，近才學相濟，足差強人意矣。天隨賣文爲活，二十餘年，近者釋褐圖書寮，編修官，予聞祕府之藏，充棟壓架而多。

希觀書，公務餘暇，涉獵蘊蓄，發諸詩詞，則其所造就，蓋不可測。青蓮不云乎：天生我材必有用，天隨亦自知其責之所在也。及其問第二集序，書此以贈，爲他日尊酒論文之地云。

大正九年仲秋

君山 瀧川資言撰

序

予嘗讀江戶物茂卿之詩而善之謂吾同文之國一水相望安得並世有其人相與游處結文酒談諧之歡耶歲戊午懷子獻侯東游得交其賢士大夫而識久保天隨先生乃以書抵予亟稱其才又曰茂卿詩尙已先生且突過之予自此而思慕先生未嘗一日忘于懷迺者先生介獻侯以所著秋碧吟廬詩鈔甲籤見貽且囑於乙籤弁一言予受而讀之煥乎有文詠其所志淵然穆然作金石聲乃使予歡欣鼓舞而不自已唐音也視甲籤尤進矣先生於漢魏以來諸名人之詩皆推究其義

法淵源虛心冥思益以所自得宜卓然成就有若此也
先生信濃高遠人間其地爲本洲之脊梁山有淺間戶
隱槍嶽乘鞍駒嶽河有天龍千曲岐蘇湖有芙蓉諏訪
巔崖岷嶂煙波瀰漫吾雖不得往而游焉讀其詩想望
之崇巒清流之勝宛在几席間則詩境之夔絕千古益
可知矣夫自貞享元祿以來風雅稱盛明治維新舊學
且加盛枕山湖山春濤松塘聽秋黃村三洲省軒卽山
諸君子皆富有篇什負一時之望先生繼之而起相與
頡頏著作之林何其偉也嗚呼吾國今日時流方以新
文學相號召若中風狂走而靡知所屆亦聞東鄰賢哲

之風而知所返乎抑吾二國者脣齒之邦也自朱舜水
往吾道東而其國日強吾國詩篇之流傳亦至明治而
日多謂非同文之沉澗能若是乎今而後吾願二國賢
士大夫興於先生之詩而益求親善之道焉斯可矣
中華民國九年庚申長至 杭縣 徐珂仲可撰

秋碧吟廬詩鈔乙籤目錄

卷四

丙辰 古今體詩一百九十二首

卷五

丁巳 古今體詩一百四十九首

卷六

戊午 古今體詩二百二十四首

秋碧吟廬詩鈔乙籤目錄終

秋碧吟廬詩鈔卷四

東京 久保得一 天隨

丙辰

一月初二游函山夜抵底倉

勝驪山下燈如市。釵影樓樓歌吹起。仙境化為銷金窩。
我輩寧伍都人士。駕言深入山之幽。險棧千縈路逶迤。
此時天黑星無芒。高下峰嶂當面峙。灑然群瀑聲喧豗。
餘流爭壑更奔駛。松作悲鳴竹狂吟。疾風一過倏披靡。
峽口夜遲絕人行。霜氣低地冷於水。幾處墅火燐樣青。
山犬呼飢吠不已。陰厓寒緊冰雪堆。蹴踏失脚唯有死。

笑我好奇涉修途。背指鳳城隔百里。山紅澗碧幾度看。
亂雲今闕林麓美。峰迴溪轉取次過。俄然開朗平如砥。
樹梢高聳閣三層。平頭奴子迎相視。半宵投宿似還家。
安頓行李心乃喜。從來湯泉驗不虛。湔盡胃腸併換髓。
堪矜舊題在上頭。勝游果自何年始。澗戶蕭森月初生。
泱泱泉響洗塵耳。一種牢騷方鏟除。靜中須悟逍遙理。

魁春樓題壁

孤枕昨宵羈思長。回頭塵事劇匆忙。殘燈古壁客無夢。
斜月空林天有霜。一任襟懷拚蕩落。誰憐身世抵疎狂。
白衫烏帽起呼酒。欄角梅花風遞香。

山中雜詩

四山積翠帶朝暎。縷縷煙騰泉氣溫。但是板橋霜尙白。
早行誰印馬蹄痕。
谿流一道拍崖聲。斷澗蒼松帶雪明。水態山容看不飽。
遙嵐賺我畫中行。
振衣笑立最高峰。脚下山河霽色濃。八朶玲瓏太初雪。
半空削出玉芙蓉。
重重彩翠劃仙區。當面峰巒入畫圖。一縷炊煙茅屋起。
半林斜照簇飢烏。
鎮日溪頭斧響閒。羈禽向暮倦飛還。白雲趁暝如潮漲。

沒了簾前一桁山

日下勺水

寬

招飲席上賦似

試問先生水竹居。炊煙颺處認村墟。翻憐齊國吹竽後。旋值陳家懸榻初。潘岳棲遲應有賦。王符耿介早傳書。同凭欄角浩歌罷。潑眼芙蓉凌碧虛。

燈影酒香春滿堂。當筵談屑又文章。蔡邕碑版夙垂範。陳壽史才真擅場。終古名賢同出處。如今浮世有炎涼。論交爾汝始相見。醉裏共聞更漏長。

寄佐藤六石

寬

次韻達澤菖水

病餘無酒灌愁城。小夢驂鸞到玉京。儘可流傳唯韻事。

終難銷歇是才名。藥爐經卷晝猶寂。微月早梅春有情。仍幸黑頭堪傲世。任他湖海感平生。

町田香雪園看梅

枯筇短褐苦吟身。遠趁幽期此訪春。鶯語如迎人勸酒。梅花似爲我開脣。滿園苔氣嫩香潤。半塢雲光晴日勻。天遣孤芳在荒僻。谿山畫裏淨無塵。

又賦十絕似同游蓄堂菖水賣劍諸君

隔崦白雲凝不流。遠香吹入午風柔。芒鞋度險矜先睹。未與梅花輸一籌。

萬玉參差梅亂開。花前吟醉莫停杯。行三十里都門外。

澗道餘寒犯曉來
崗勢低昂一徑通
萬梅開作雪玲瓏
賞心何管春寒緊
立盡濛濛花氣中
寥寥雞犬似仙源
澹沲風光春放暄
匝地香黏雲一白
千株梅擁數家村
眼前咫尺白雲鄉
行盡崎嶇一路長
日氣微籠山色澹
梅花晴帶鳥聲香
橫斜一一瘦逾眞
閱盡冰霜意態新
萬古孤標空谷底
依稀認得我前身
仙種移來春有緣
藍田彷彿玉生煙
此間一闕梅花國

雪月交光二十年

疏鐘一杵隔谿聞
斜照花陰濛不分
也是杳然迷出處
四方八面只香雲
餘薰滿袖覺微寒
回首陂陀路幾盤
唯有梅花巧妝點
山輝水映畫中看
醉裏頻裁幾首詩
空山暝色欲歸遲
入城怕被紅塵灑
莫折吹香雪一枝

芳野看梅

好山仍舊識
相見意慙慙
墟落晨煙薄
林臯霽色分
俗情渾付水
逸興欲凌雲
一路東風細
袖邊花氣薰

和集四庫詩金 卷四
旋喜輕陰散。新晴鶯語忙。林端明認白。風外遠聞香。籬
落春偏嫩。松筠寒尚蒼。花光看不飽。佇立石橋傍。
微和風習習。延賞步遲遲。日午煙猶襯。花寒蝶不知。青
山圍古驛。白屋帶疏籬。地僻人來少。孤芳與我宜。
亭亭數株古。鼻觀冷香新。老幹看如鐵。疎花最可人。林
巒拖澹靄。風日恰初春。野店宜吟曠。傾杯酒味醇。
花如未消雪。林下眼偏明。日氣暈仍煦。煙光描不成。午
陰千嶂合。野水一橋橫。溪壑曾探勝。回姿更有情。
春山靜於睡。黃鳥語相催。移步危橋畔。迎人半樹開。清
標真獨立。同調莫相猜。容易吟成處。花前又舉杯。

去去煙霞裏。趁香聯屐尋。萬株春得氣。一崦晝生陰。澗
斷枝皆仄。徑幽苔自深。吟愁清不耐。似有嫩寒侵。
待渡呼舟子。停筇立澗阿。礮崖灘響壯。經雨漲痕多。微
徑緣青壁。斜陽逗碧蘿。回頭花遠近。雲氣罩陂陀。
金剛蘭若古。幽靜遠塵寰。初地花香漾。上方鐘語閒。孤
煙村隔岸。殘日樹遮山。丈室金爐冷。打包僧未還。
邱壑多佳趣。何時此託栖。溪頭數戶閉。竹裏一禽啼。花
霧兼山暗。炊煙帶樹低。年前游跡在。鳥道峽天西。

三月十八日。中村背水。設令尊黑水翁贈位。祭於
東台精養軒。予以累世之誼。列席末。乃賦此以奠。

濂洛性理窮淵源。翻以皇道爲本根。畢竟通儒貴實用。
可無遺澤千古存。聞說先生卯角日。一家窮餓俱銜冤。
孤村謫居夜讀處。破牕風雪燈火昏。十年值赦親不在。
北邙風樹聲淚吞。負笈茗鬻錐刺股。劉峻力學才孤鶩。
知音誰若林祭酒。奪席每舉經義論。進德館裏絃誦盛。
時文物凌群藩。時乎日非風雲慘。羽檄旁午多訛言。
勤王大義警當世。丹心誓欲護帝閭。坤輿形勢如指掌。
萬邦要仰扶桑曦。獨憾宗慤志空老。目斷滄海鯨濤奔。
一朝龍飛政復古。殺氣消盡豁乾坤。生逢清時吾事足。
泥塗笑視軒冕尊。從是穩臥草廬裏。操觚摘槩避世煩。

南信

平

先

萬軸琳琅入祕府。永傳乃父心血痕。絳帳依舊書聲靜。
春風桃李花滿門。解詩鄭婢閒侍座。朱顏白髮笑語溫。
家君少時亦受教。通家誼舊情彌敦。膠序同職相倚重。
蹇修卜吉爲定婚。識面無緣吾生晚。桑梓曾聽輿頌喧。
何須辛苦探軼事。儼然典型在兒孫。去歲登極方修禮。
鳳詔新下旌閭門。料知英靈長不死。泣拜海嶽天家恩。
此日東台設齋宴。微雪初霽春放暄。林樹欲花鶯出谷。
依稀風光憶故園。玉樓何處雲漠漠。壇前拜跪薦綠罇。
擬唱哀些歌一曲。遙招先生天上魂。

阪本天山先生亦有贈位。三月二十日。舊藩主內。

藤子爵類補設祭併告諸祖廟得二得陪席乃賦此
 鳳凰須棲梧桐樹百里固非大賢路窮達有命竟如何
 果然先生亦不遇精該學殖冠一時寧屑尋常章句師
 閒居聚米講陣法嘗作突貫之陣胸中甲兵韜略奇紅夷火技世
 無匹弱冠學得入其室鎮城巨礮旋轉臺兩者共係先生所創機巧總
 從妙思出曾游南紀觀捕鯨亂濤山立飛舸輕昆明習
 戰何足擬水軍進退多發明未陽當日困龐統一朝笑
 擲芸香俸絕似孤鶴出樊籠江湖從是游目縱晚寓瓊
 浦熟華音九經真義仔細尋所著有九經音釋等虞卿著書枉矻矻仍
 剩夙昔報效心飛鸞島上觀兵處戈戟映日天初曙礮

聲捲起紫海波指揮如意自容與旅食多年鬢有霜一
 坏黃土又異鄉空傳故老口碑在儀表酷肖關雲長平
 生教人期成器歎息舉世安無事祇幸門下俊秀多延
 之雄藩繕兵備攘夷詔下文久年要教國威宇內宣巨
 彈容易摧虜艦赤馬關雲櫻島煙先生所創砲術世稱天山流其西游過長州藩士多就學者其在長崎薩人亦有傳
習者共秘之後年薩長兩藩砲擊外船實用其術環海飛警逐年急萬戶之封芥可拾醉魂
 騎鯨杳無蹤于今追慕淚仍溼天家疇昔錄偉功一封
 紫泥下鳳宮桂醕列筵此設祭又拜遺墨欽英風蓋棺
 論定美難掩海西猶存祠堂儼始識秀靈生偉人萬古
 信山青如染

四月初三水竹雲山房小集次草間天葩祇候時福韻

春事眼前盛。林園晴日佳。當簾花影悄。隔竹鳥聲啾。仍
賸煙霞癖。且披詩酒懷。諸公多雅量。許我喚同儕。

又次伊東聿水祐忠韻

吟懷忽向酒邊新。把臂相逢同調人。細草幽花昨經雨。
引儂游意入濃春。

四日與五城同學諸友飲仍疊前韻

尊前憐看鬢華新。我是風塵潦倒人。花氣籠簾燈暈大。
酒波瀲灩欲涵春。

寄草間天葩

峭寒如水夜方遲。想見先生誦楚辭。香草美人尋古意。
女蘿山鬼有餘悲。老來力學志何篤。醉後試吟才倍奇。
名姓已登循吏傳。從頭出處兩相宜。

鷹野氏夫妻婚娶五十年賀詞爲令嗣止水勇雄囑
集唐四句

無事無憂鬢任蒼。李中團情團思醉韶光。李群願留今日交
歡意。包佶花氣渾如百和香。杜甫

初晤伊東晨亭樞密巳代治席上賦呈

欣然長揖識荊州。敢道青衫意氣投。當日龔黃多異績。

卽今燕許孰同儔。每聞寰宇干戈警。偏怕君王宵旰憂。猶是胸中餘裕綽。公餘翰墨最風流。

杏花詞三十首

酥雨纔晴凝露勻。張萱畫筆恐難真。隔牕一瞥欲相語。數朶紅酣惱殺人。

一樹斜欹近綺牕。到頭品韻是無雙。曉來好引鶯兒住。似與儂家教度腔。

燕語鶯啼晝漏微。數枝寫影上簾幃。尊前高興偏憐汝。一曲須歌金縷衣。

桃前梅後賣錫天。一片春愁易黯然。花下偷看墜釵在。

鞦韆院落夕陽妍。

深深庭院燕飛低。花霧霏霏春欲迷。停繡闥中人悄坐。

一枝紅鞦玉欄西。

調粉勻紅試靚粧。怯寒只愛立斜陽。多情似學東鄰女。

悄地頻窺宋玉牆。

畫橋西畔綺樓南。薄暮輕寒酒半酣。紫恨紅愁春萬種。

絕憐一朶杏花憨。

玉奴扶醉倚欄干。拍遍紅牙歌正殘。疏影巧描花態妙。

幾人解得月前看。

脈脈春愁夜欲闌。風吹香霧上雕欄。如何同在月明底。

和琴川風言金 卷四
儘遣梨花作嫩寒。
蝶戀鶯迷春盡餘。依依煙景罩郊墟。斜陽門巷花低亞。
仍憶當年董奉居。
一抹絳雲斜照前。銅陵山色翠娟娟。花開花落堰空在。
不見燒丹葛稚川。
幾載青衫入棘圍。銀袍今日帶春暉。曲江宴散花堪折。
得意郎君插帽歸。
妖姿素面曲欄頭。標格曾教妙妓羞。腸斷揚州花似舊。
絕無綺宴繼風流。
儘教春色惹相思。目斷梁州天一涯。寧料故人還夢我。

慈恩寺裏看花時。
晴日春深碎錦坊。相公高臥午橋莊。與花占斷風流了。
矧是亭臺冠洛陽。
朱陳村裏簇紅霞。一路幽香夕日斜。雞犬有聲家遠近。
仙源未必屬桃花。
最嬌嬌處最銷魂。非霧非煙霽景暄。句引游春狂杜牧。
酒旗影閃夕陽村。
翦盡絳綃春正闌。烘人日氣露初乾。采香徑口一株艷。
記自樊南詩裏看。
露重煙勻花不疏。梢頭春鬧雨晴初。一聲檀板新腔妙。

俊煞風流老尚書
花間置酒憶坡仙
香雪霏霏落綺筵
例有少年能解事
洞簫吹向月明前
鳳樓燒盡燭千條
幾隊舞兒羅袂嬌
悄倚欄干怯花睡
酣春時節可憐宵
回首中原王氣終
一枝花發爲誰紅
鑿與北狩行逾遠
萬水千山隔故宮
紗窓嫩日曉寒輕
生怕紅閨夢乍驚
枕上聽殘夜來雨
賣花聲作一天晴
翠蓋紅妝意態殊
遺山妙句古今無
不妨抵死憐春色

野史亭前種幾株

重趁春闈歎故吾
明年衣錦得歸無
吳家姊妹才何慧
描得杏花雙燕圖
種遍江南佳麗鄉
雲舒霞卷漲韶光
無端風擺紅狼藉
底事東君妬艷妝
日暮只聽鶯亂啼
禁煙時節驛亭西
傷心春在風前盡
滿地落紅黏馬蹄
紅雨一天花亂飛
嫩寒如水浸吟衣
黃昏愁見春陰合
舊院淒涼燈火稀
殘紅陌上尙紛披
夢裏春光盡有期
賦到銷魂例多淚

夜來風雨葬西施成句猶記嫩晴花韻新一尊隨處了前因品題豈落元家後好向詩中長駐春

西井松濤倉吉七十壽詞集杜四句

人生七十古來稀回首風塵甘息機白日放歌須縱酒斬新花藥未應飛

與好文會諸子約熊谷看花以事不果

江干春合遍此日約吟行酒氣和花馥詩魂趁蝶輕
人又風雨臥病過清明長晝閒無事彫梁燕壘成
睡起疎慵極茶煙一榻橫勝游期後會孤悶負平生草

綠經新雨花酣繪晚晴幽庭堪矚目鶯語漫多情

與平松豪溪市藏工藤日東鐵男結城菴堂飲

長安桂玉歲華淹一領青衫淚易霑戒後幾回尋本事可無綺語續香奩

訪森川竹磎次其近作詩韻賦三首

曲徑苔香溼來敲竹下門遙天獨鵲響深樹數花存皮骨何妨瘦風懷儘可論加餐要自重湖海布衣尊
欄角餘暉澹春殘悄掩門知音君善病力學我猶存夙分因詩苦惟嫌與俗論提撕同此志昭代雅音尊
花飛蝶斷魂新樹蔭柴門人意坐來澹韶光何處存昇

平真可樂雅頌始堪論白雪高千古寧輸軒冕尊

寄況夔笙周頤在滬上二首

捲地煙塵戎馬忙離憂偏入楚歌長一腔新調張春水

滿架奇書鮑夕陽鮑廷博有夕陽詩盛傳於時人呼為鮑夕陽見阮雲臺定香亭筆談論到過秦嗟浩劫

志關濟世豈佯狂吳淞何日抽帆訪萬里滄波恨渺茫

相思疇昔夢空牽眉隱樓高滬瀆前四海蒼黃避兵日

半生韜晦著書年夙知周黨收蹤遠終信陶潛守節堅

殊域如今賞音在儘從文字結深緣夔見序拙集故云

訪日下勺水次其近製詩韻

步從郭外故遲遲一路餘春景亦宜枳殼花明村巷靜

雞聲報午嫩晴時

次竹篸小病口占韻乃寄

青尊何日續前歡一段傷心花已殘昨試袂衣今怕薄

綠陰易雨又微寒

絕代風流詩酒歡依稀昨夢與春殘一簾樹影茗煙碧

節過落花鵲語寒

僧房夜坐限韻

四山嵐氣罩疎燈寺在諸天第幾層相對嗒然無一語

梅檀香裏坐禪僧

贈福田眉仙周題其西游畫冊併索瞿塘劍閣兩

圖

煙岫雲巒元氣藏。江左名家算三王。王遜之時敏王元照鑑王石谷暈逸筆飛
 墨開生面。石谷渲暈最擅場。虞山婁東分流派。爭矜毫
 端風雨快。當年伊九字費源漢來我邦。江湖始重南宗畫。殘
 縑斷素猶有神。憾被後生誤其真。心外傳妙談何易看。
 盡山水竟無人。衆史漫偷聲名赫。葫蘆依樣摹陳跡。自
 非浩氣盪心胸。到底頽墮歸凡格。山陽田生曠世才。早
 歲能兼六法該。疇昔橐筆游禹域。萬里乘槎溟渤開。片
 帆徑到吳淞口。西風明日秦淮柳。旋有夢魂向蠶叢。忽
 忽未醉巴陵酒。百丈曳船趁水程。江豚吹浪變陰晴。灘

向家

流廟樹黃牛峽。夜月霜砧白帝城。成都春色無賴甚。十
 萬海棠爛於錦。草堂寺近武侯祠。玉女津望江樓舊名頭百壺
 飲。去攀峨眉最高巔。振衣長嘯手捫天。日圍月暈眼前
 幻。俯瞰齊州九點煙。蜀棧北連秦關險。歷歷巴山雨初
 斂。度盡鳳嶺立馬看。一帶渭濱樹如染。灞橋柳殘重值
 秋。長安昨夜月當樓。金粟堆古驪宮寂。潼關斜拖黃河
 流。王氣銷沈悲燕市。景山滿日夕陽紫。榆塞風高鷓鴣
 盤。天荒地老感何已。壯游幾載鴻爪蹤。故國尊鱸歸思
 濃。行裝添重是畫稿。攝取河嶽英靈鍾。擺落萬象看筆
 力。眼中久已無法式。雲嵐繞座水有聲。乘興潑盡淋漓

亮見

墨與君偶作今夕歡。雞黍薦酒披肺肝。解衣盤礴眞畫者。談屑霏霏宵欲殘。通神佳手自矜貴。微瑕唯少書卷氣。從今藝苑好提撕。畢竟詩畫同眞味。行冊重修神思勞。不怪聲價一朝高。展之浩然游意動。欲麾海若駕煙濤。石躍瞿塘水方漲。雲擎劍閣山相向。梁益鎖鑰南北分。一上君筆雄更壯。吳練兩幅願寄吾。臥游日夕供清娛。矧是城中三伏候。挾纈直抵北風圖。

銷夏三會詩追和郭頻伽

夏日田園雜興十首

亂蟬聲沸遍林岡。午夢驚回汗似漿。前澗何人來洗馬。

一株高柳乍斜陽

獨木橋邊竹樹圍。溪流一曲漾殘暉。村童罷釣家鳧散。猶有蜻蜓點水飛。

綠稻田田欲著花。連旬大旱使人嗟。社公禱罷歸來晚。待月今宵踏水車。

倦暑身如墮甌中。蘆簾一桁夕陽紅。雲崩峰勢忽無跡。雨過他山唯看虹。

濁酒牆頭晚一過。繩牀草席興如何。黃瓜摘盡紫茄熟。看到豆花秋意多。

趁涼且向柳邊停。揮扇鄰孃巧撲螢。恰是橫塘無月夜。

微風吹墜露華青

風扇露衣涼一宵。槐陰聯榻遣無聊。可憐幾個閒男女。例習京腔曲曲嬌。

稻花風裏葛衫輕。貪看三更月色清。一帶郊墟涼欲溼。聽多於雨是蟲聲。

一林曙色起啼鳥。行藥乘涼殘夢蘇。綠芋葉開荷樣嫩。倚筇小徑看跳珠。

步從清曉獨徘徊。魚躍聲中涼氣來。知道孟蘭盆會近。滿塘風露藕花開。

夏日游仙詩十首

洞門盡日白雲封。儘遣祝融鞭火龍。下界紅塵欲成瘴。遮藏五嶽翠重重。

住近上清風自涼。老君鍊藥鎖瑤房。芸童晨趁青牛出。露溼一陂瓊草香。

霧閣雲牕捲碧紗。群仙列宴笑聲譁。珍羞不帶腥葷氣。千歲紅桃一尺瓜。

遠到咸池日未殘。歸來紫府也高寒。如今始信麻姑語。愁絕蓬萊水半乾。

龍君騎過泰山陰。疇昔降符天使臨。步下雷霆坤軸震。馬鬃一滴作甘霖。

琉璃宮闕夕陽前。一抹青霞樹色妍。洞口風涼鶴歸未。
仙童獨枕白雲眠。畫裏三山蜃氣新。海天雨霽碧鱗鱗。閒來笑伴任公子。
好把虹霓作釣綸。消受瑤臺半夜涼。簫聲吹斷碧雲長。迎秋偏怕清光減。
修月工人玉斧忙。一天顥氣夜涼生。洞裏瑤牕月正清。底事步虛逃席去。
明朝須罰許飛瓊。六銖衣薄夜深游。瑪瑙天寒露欲流。吹上崑崙最高頂。
一聲鐵笛忽生秋。

夏日閨中詞十首

冰肌生汗暑威加。倦繡無言倚碧紗。唯有侍兒能解事。
綠牕書靜點新茶。困臥紗幮日正長。夢醒檻外乍斜陽。褪紅衫子涼初透。
脈脈惱人荷氣香。隔簾女伴語喃喃。槐影滿階斜照銜。浴罷晚妝都懶整。
要涼且試白蕉衫。露珠點點綴圓荷。絕愛池亭涼意多。十八扇牕迎月未。
水晶簾底望銀河。移牀偏愛小庭幽。好喚鄰娃又下樓。恰是黃昏過雨後。

微風觸竹一螢流

滿天墜露夜淒迷。銀浦流雲一片低。獨自憑欄吹笛罷。初三月轉畫樓西。

新裁白紵愛衣寬。不管爐煙心字殘。茉莉花開艷于雪。微涼庭院倚欄看。

桐陰夜靜月微明。紈扇初拋涼乍生。挹得西郊風露氣。紗籠好貯草蟲鳴。

欄干一曲畫簾垂。別院無人燈上遲。留取孤尊與郎酌。晚來偏喜雨催詩。

何來涼氣晚蕭蕭。井畔旋看梧葉飄。水簟銀牀秋到早。

一天風露近星宵

與好文會諸子飲大森旗亭

海樓宜滌熱。逸興共抽毫。風定鷗眠穩。潮生魚氣高。遣愁詩始雋。對酒膽能豪。更約清秋節。聯鑣看亂濤。

歸途步至鈴森得月

沙汀步不盡。漁笛入風長。潮漲疑無岸。月明俄有涼。三更黃鶴過。十里白蘋香。露氣催秋處。伊人水一方。

訪伊東聿水酒間同賦

庭樹涼飈急。又驚秋士心。江湖餘昨夢。文字感知音。四壁蟲聲苦。一窓燈影深。與君緣自舊。醉裏且追尋。

輓木蘇岐山

牧

一例逢人罵眼中。唯有公風流趁坡老。格力亞涪翁。昨夜傳騎鶴。三秋獨聽蟲。金城曾會面。廿歲夢忽忽。海內識書淫。尤欽蘊蓄深。江山昨游跡。冰雪古人心。賣字自清況。裁詩誰賞音。夜雲寥廓遠。一片月如襟。軼才存夙志。大雅誓扶輪。宿學通經史。高歌感鬼神。如何梁苑客。去作玉樓人。佳句荒陬遍。弓衣織得新。

訪阪川翠濤

巖壑

席上次上村賣劍詩韻賦似

爽氣滿亭檻。相逢尊酒開。十年憐汝疾。半世誤吾才。斜照蟬嘶樹。微涼竹掃苔。五城游跡在。夢裏歲華頽。

清吟詩似水。風骨任低摧。茗氣當簾淨。秋聲約樹來。此生渾未卜。舉世漫相猜。知己期身後。寧嗟老草萊。

橫川唐陽

蘇

數見貽其集賦此爲謝

欽吾南信秀。卅載姓名揚。刀匕參蓮幕。風雲滿錦囊。秋寒燈半點。人在水中央。日夕相思切。何當屬一觴。新著誦方罷。臨風憶昔游。鳴門潮滾滾。屋島鬼啾啾。引領空千里。懷人又九秋。北溟天更隔。爲我寄詩不。

游息山房小集次草間天葩韻

吾翁挂冠後。高臥老邱園。疇昔看花淚。終生戀闕魂。獲詩傾酒榼。留客餉魚飧。一水渺然暮。歸飛鶴立門。

次天葩翁山房秋興韻

領略江山勝。翛然避世喧。深林鳥知樂。廢寺佛仍尊。潮
潤魚龍夜。燈稀蟋蟀村。此間嘉遯好。何羨辟疆園。
閒來買山住。松下穩關門。富貴笑槐國。逍遙宗漆園。天
高憐鶴倦。心靜看雲奔。試取前賢比。風流辛稼軒。
晨携鴉嘴去。欲劔茯苓根。偶見銜花鹿。還逢拾栗猿。天
風颺仙袂。雲木盪詩魂。晚節優游裏。長懷聖主恩。

次湯河遠洋韻乃呈主翁

隔林疎磬夕陽遲。逸興可無題壁詩。秋水蘆花橫小艇。
炊煙茅屋擁彎碕。尊前佳句賞心足。欄角微風涼味宜。

來日應歌招隱士。夜深唯有桂香知。

補和伊東聿水曩贈主翁之作

鏡裏憐看白髮生。感秋宋玉若為情。驚人事業談何易。
命世文章任不輕。海濶天空宜遠矚。黃簾綠幙有餘清。
養真早晚隨君去。一路巖阿采藥行。

武富蜃堂藏相時敏命予校蒼海先生全集累月卒

業偶得七律五首併呈藏相

大節堂堂社稷臣。和戎功就畫麒麟。雅音欲嗣曹劉盛。
儒術曾傳鄒魯淳。三楚煙濤帆外晚。六橋花柳雨中春。
鉤章棘句詩成卷。又識鴻踪有夙因。

彤庭當日著峨冠。不怪蒼生憶謝安。曠古文章多感慨。
千秋事會自艱難。功勳只合凌房杜。道義終然亞孟韓。
白首高歌歸雁操。老來豪氣尙闌珊。
天恩未許卸纓簪。柱石由來世所欽。璇室璜溪他夜夢。
白麻紅燭老臣心。夙知韓范名殊重。翻想呂伊憂倍深。
千首遺篇看寄託。果然瑤瑟有徽音。
皓朗鬚眉儼若仙。錦衣玉帶去朝天。中興人物儒流貴。
大陸風雲世局遷。峴首賸碑羊叔子。壺頭齋志馬文淵。
執鞭空剩平生願。賦到招魂淚黯然。
絮酒墳前奠一卮。愧吾十歲獲名遲。角巾東閣欣延客。

華蓋西園笑賦詩。氣概能教本朝壯。精忠不負聖君知。
如今初喜前緣在。剔燭空齋校字時。

秋曉

悄聽階前蟲語繁。海棠瘦倚短牆根。依稀繪出月之曙。
白露潤於過雨痕。

次達澤菖水韻乃寄

島瘦郊寒意自如。此生濩落世情疏。江湖滿地酒消候。
風雨懷人燈上初。聖世幾年空櫝玉。名山河處可藏書。
虎頭食肉非吾分。日夕蕭齋懶祭魚。

草雲書屋雅集次伊東聿水韻併似湯河遠洋

郭外尋幽約秋從雨後新。階苔淨難唾。籬菊澹如人。移
目川原蕭。銜杯意氣真。長安天尺五。陌上簇車塵。

席上限韻

爲愛田園景。孤村構草堂。虛懷慕陶謝。雋句軼王楊。野
曠稻雲合。林昏蟬語長。西風催晚霽。餘照逗簾涼。
雨痕都作露。蟋蟀韻莎庭。林末歸雲白。天邊晚岫青。終
年少適意。大塊尙勞形。好擬昌黎筆。題名燕喜亭。
籬落隔塵境。邀人秋色妍。樹邊苔徑滑。屋外菜畦連。傲
世貧相慣。尋詩興始牽。能爲松菊主。肯羨玉堂仙。
野色青無際。涼天積雨收。風塵身易老。湖海跡何悠。斷

雁橫遙夜。疏花繪素秋。吟腔爽如許。一醉且遲留。

秋暑

厭聽高梧蟬噪頻。趨炎附熱了無因。遽然舉扇西風晚。
仍怯元規塵汚人。

香山樓小集分韻同大澤鐵石真吉勝島仙坡仙

溪亭忘溽暑。浴後葛衫輕。庭樹遞涼吹。軒窓看晚晴。蟬
聲竭來急。秋氣灑然生。一醉披襟處。新詩容易成。
遲留貪好景。把臂兩心傾。卜夜酒添味。泥人涼有情。風
從蘋末起。月逗樹間明。聯句興逾逸。一腔詩思清。

次仙坡韻併似鐵石

爾我既同道。涼宵尊酒親。樓臺迎月好。天地入秋新。譚足驚群俗。詩須趁古人。締交從是始。醉墨看精神。

長井金風行見訪賦似

丈夫存志氣。季世尙堪爲。力學能通易。銷憂莫廢詩。一篇如贈我。十襲合藏之。天地且拳曲。誰憐山澤姿。莫逆情方合。劇談頻翦燈。俗儒例多妬。君子未無朋。腹藁擬王勃。書廚思陸澄。須拋心力盡。共見雅音興。

聞歐洲戰報

萬丈機槍射斗牛。風雲慘澹又驚秋。衡從屢變安危局。宵旰寧忘社稷憂。須遣偏師擒頡利。仍期新曲奏伊州。

非遭玉馬朝周日。終古沙場哭鬪髀。

歎息蒼黔性命輕。何來鐵騎忽縱橫。連年慘禍紅羊劫。絕代雄才青史名。不怪春秋無義戰。可憐蠻觸尙紛爭。幾時能挽天河了。日月重光廓太清。

航海

海天晞髮立。疑是跨長鯨。積水望無際。孤舟愁乍生。風吹鮫淚散。煙擁蜃樓明。鄒衍言初驗。九州當面橫。

聞高橋月山作衛罷官賦寄

昨挂貂冠著角巾。江湖初寄自由身。燈華四壁蟲欺枕。秋色滿林楓醉人。仍有殷憂關社稷。莫教衆俗誤經綸。

詩徵酒逐從今好。附驥期扶大雅輪。

驟寒

細細啼蛩竹露前。授衣時節驟寒天。紅蕉已老紅蓮死。翠袖佳人瘦可憐。

土居香國

通豫

見貽仙壽山房詩文鈔賦此爲謝。

肯傲橫經弄翰儒。鏡中曾惜好頭顱。當年讜議陳同甫。晚節豪吟高達夫。雙屐煙嵐涉林壑。一尊風雨又江湖。出塵貌近古稀歲。雪樣鬚眉鶴樣癯。霞蔚雲蒸爛有光。姓名不朽只文章。卅年官達垂朱紱。萬首詩成滿錦囊。如此奇才亞袁趙。絕無艷語趁齊梁。

活

麗都風月騷壇寂。除却夫君孰主張。

陽春白雪郢中詞。淨几焚香手自披。坡老襟懷真灑落。放翁風格最清奇。名期歷代須相勉。交到忘年仍未遲。高臥方矜身分好。苦吟何管鬢成絲。

次大江因是

天也

七十自壽韻乃贈

出處兩非凡。天亦永斯祐。丈室獨參禪。夜闌曼陀雨。昔值國步艱。功名唾手取。四海殺氣消。王業茲復古。一朝初志酬。鄉人記題柱。失脚時還非。黑獄十年苦。孤鴻超海飛。雞林久奮羽。笑揖萬乘尊。宏謨外禦侮。老來看餘豪。力縛南山虎。星斗羅在胸。才軼何水部。邂逅非良圖。

愧與兒輩伍。鐵鉢生蓮華。洗心禮初祖。幾萬旃陀羅。渴仰勝生父。風骨肖僧伽。寶壇時揮塵。矍鑠古稀年。悟道夙安堵。慈悲信無量。接武大教主。願以此功德。增益不勝數。乃使修羅場。化作乾淨土。

十一月三日奉賀立太子盛典

去歲升恆今立儲。藹然喜氣遍州閭。旋看秋色淨天地。正是楓宸降詔初。鵷鷺凌晨趨紫閣。扶桑紅旭照乾坤。挺然日角何岐嶷。不負堂堂明治孫。繼體元良國棟成。金甌無缺儼神京。欣瞻四馬退朝處。

日射九旗霞彩明

鷗社大會席上次三宅真軒

少太郎

詩韻

昨雨痕乾欲起塵。帆光鷗語墨江濱。微暄不負小春節。隄樹著花狂似人。塔影橋姿畫裏新。高樓百尺水之濱。一筵相見多生面。但道能詩是可人。晚潮涵岸碧鱗鱗。觴詠方酣勝洛濱。欄前斜照波山紫。蘊藉還如舊識人。笑擲黃金買斷春。年時修禊此江濱。兩行紅粉仍相識。孰是花前捧硯人。

送今關天彭遊禹域次其留別詩韻

濛濛殺氣滿燕京。地覆天翻何限情。萬壽玉泉依舊在。
西風斜日少人行。為龍為虎賭輸贏。極目風雲一愴情。劫後荒涼知己盡。
仰天應唱雁門行。萬軸琳琅待定評。焚坑以後幾傷情。期君他日都收拾。
幾處名山著意行。

次湯河遠洋卜居雜詠韻乃寄

考槃知在澗。庭樹聳於山。好傍薜蘿徑。別開泉石寰。高
懷羞巧宦。晚節慕仙班。詩酒時邀客。悠然野興閒。

清才能幹事。不似古人貧。棄屣時移竹。披裘未拾薪。琴
書一牀淨。風月百年親。福地何蕭爽。優游了勝因。夫君風骨秀。志操自非凡。勵己身三省。憂時書一緘。林
園秋色好。墟落夕陽銜。信步過幽徑。桂香吹短衫。城南幽僻境。谷口不稱愚。當檻煙林合。傍流沙路紆。身
同棲鶴穩。心趁片雲孤。起臥詩材足。寧教筆硯蕪。築室紫巖下。高人劉孝標。涉園時縱目。掃榻笑伸腰。喬
木亂鴉集。孤村歸馬遙。冷然自稱善。詩思滿清寥。高橋月山招飲諸同人於芝浦雙魚閣酒間次上
村賣劍詩韻

欄前秋色話襟期。平昔孤懷兩鬢知。極浦歸舟潮上候。
寥天落木雁來時。終生有願盈罇酒。到處留名題壁詩。
明日新晴還鼓枻。滄浪一曲許相隨。
綺筵入夜蠟煙堆。不怪元規風範頹。釵影鬢香羅妙妓。
烏巾白袷會群才。百壺飲作酡顏好。四座歡教笑口開。
擊碎珊瑚興方逸。浩歌容易破愁來。

游三谿園

汀頭秋正殘。四顧無人影。荷盡浪花圓。一池魚氣冷。
分明蘸橋影。一汀疊漣漪。游魚自成隊。寒藻舞不移。
谷口紅葉亂。日澹午寒添。片雲不能色。唯覺衫角霑。

喬樹半天參。雨氣束之溼。挾秋颺勢迴。澗泉響更急。
登登一徑斜。步到翠微半。風意變陰晴。松釵先雨亂。
風鐸冷仍警。併聽萬木號。嫩嵐吹落地。林頂塔尖高。
松氣雜苔香。濛濛罩林麓。石上嘯者誰。訝看鬚眉綠。
潮光帶雨遙。帆影入煙去。緬想廿年前。是吾釣游處。

寒夜

四壁寒如水。殘年愁正濃。風聲偏在竹。鶴夢不離松。罵
俗名心澹。耽詩世事慵。酒醒閒擁被。聽到五更鐘。
月色當欄苦。嚴霜白滿郊。乾坤一何寂。筆硯未曾拋。風
峭猿鳴澗。天寒鶴守巢。敕童門莫鎖。夜半有僧敲。

七臺詩追和李退谿

七臺非臺也李退谿中年罷官退處月瀾菴其地近山臨水而崖斷如臺形者凡七因撰佳名各系小詩高情遠思可以概見退谿奉程朱學於理氣之說頗有所發明晚節官亦至顯榮洵不負為朝鮮儒家之翹楚也予曩有三十臺懷古詩題名相似乃依其韻追和併表平生敬慕之意云

日落山之幽亂泉鳴澗壑猿狖嘯成群石氣和煙碧緬想楚靈均何處尋遺躅叢桂忽送香植節且止息寥天明月孤露氣漾秋水何日泛宅去追跡玄真子鐵

招隱臺

笛試三弄閒潭蛟龍起明日復來茲先悟濠上旨

月瀾臺

崖樹碧如洗澗水鳴佩玉幽勝絕相似武夷谿九曲我志在考槃此間居堪卜高舉返自然寤歌矢弗告

考槃臺

平臨長江水穩靠百尺崖筆牀與硯匣座邊巧安排向夕群動息山山秋色佳俯仰天地濶撫己有深懷

擬思臺

不學陶朱公不擬葛稚川介然守吾節優游唯樂天曳縱歌商頌有慕曾參賢終生立於獨何復嗟斷絃

朗詠臺

欲乘天地正去入窈冥間御風恨有待矧又旬餘還一心合萬化冰雪不能寒多事避穀者白石日供餐

御風臺

誰讀大人賦徒爾思凌雲今我臺上立江山形勝分入

夜星斗爛。白露滌塵氛。茫茫覆載間。要觀自然文。

凌雲臺

次巖溪裳川

晉

歲晚書懷韻

難向沙場期裹屍。扶將傲骨臥茅茨。久輸彭澤既無慮。敢擬楚丘終一噫。末俗文章亂儒墨。太平宰相孰臯伊。殘宵爛醉歌初放。何用窮通問卜龜。兜率天高不可攀。枉憑酒力駐朱顏。蠅頭文字擿魚魯。蝸角功名嗤觸蠻。萬事淒涼歲云暮。半生齷齪恨難刪。苦吟矧復慙吾拙。詩債依然積似山。

秋碧吟廬詩鈔卷四

秋碧吟廬詩鈔卷五

東京 久保得二 天隨

丁巳

遠山雪

一峰拔群巘。萬仞衝蒼穹。儼矣東方鎮。崢嶸凌泰嵩。羽客翩其往。驂鸞御天風。衆壑陰晴異。靈祕誰敢窮。皚皚太始雪。白玉何玲瓏。初旭射之爛。潑作珊瑚紅。殘雲曳如縷。襯映畫樣工。看當驛樹缺。照入雙闕中。憶昨著仙舄。飛步度崆峒。題名絕壁上。爪痕趁冥鴻。今日閒倚檻。舒嘯吟思融。歲回景乍換。瑞氣春蓬蓬。

函山值雪

同雲低地暗。白雪忽漫漫。但聽竹聲急。偏教梅意酸。谿
崖高萬仞。山路曲千盤。始覺我行遠。長安回首看。
松篁巧妝點。四顧玉成圍。冰滑單車路。風飄孤客衣。群
流爭壑咽。六出攪空飛。料識遲吾久。溪頭開半扉。

次伊東晨亭樞密周甲自壽詩韻乃呈

耳順公逾健。未見雙鬢衰。元龍賸豪氣。牀下麾群兒。昔
從蕭曹後。禮闈不曾離。昇平人自理。四海俱遨嬉。報效
志何已。優渥恩無涯。老來班樞府。仍誓畫一奇。知音久
感激。汲引亦有時。文章豈小技。王湛終不癡。

次福井學圃

解

五十偶賦詩韻乃寄

騰化果何術。等閒瞻具茨。風塵同世路。湖海孰心知。萬
事莫如酒。一生偏託詩。流觀小宇宙。象外有餘師。
知命趁先聖。鬢絲如爾何。纔除作詩苦。爲是讀書多。花
月雙輕屨。乾坤一浩歌。及時行樂耳。莫漫戀巖阿。

訪伊東聿水酒間同賦

坐久談方劇。暮寒簾卸遲。頻斟上春酒。欲較去年詩。四
壁燈華燦。一盆梅萼披。唱酬從此始。隨處趁佳期。

草間天葩招飲席上次見似詩韻

疇昔丹墀下。知君賦早朝。宮鶯喚人轉。陌柳引春嬌。宰

和東坡詩金 卷五
輔頰相迭賢良亦見招爲班耆老次歸舍伍漁樵
軒前霰聲急坐對玉梅枝一笑傳杯好三更剔燭遲文
章與時負肝膽向君披睥睨古今盡放懷唯有詩

鷗社席上分韻

池面玻瓈未釋冰林亭賴有酒如澗少年慣射南山虎
快意誰追北海鵬花月銷魂久成習文章經國老初能
長安桂玉何須歎來日尋春倚瘦藤

迎春

迎春底事少歡娛形貌依然山澤癯愧做揚雄甘薄俸
枉隨阮籍哭窮途關心白眼讎何速脫手黃金俠已無

看到梅花愁可解杖頭挂得酒錢麤

紅梅

花脣纔綻點胭脂最是移人女字枝幾曲艷歌腸欲斷
紅羅亭上薄寒時
檀心玉骨倚東風嬌靨勻圓媚態工須向劉伶墳上種
依稀似帶酒痕紅
深深庭院早鶯天嫩日微風春乍妍靜女其姝欲相語
一枝紅暈繡簾前

早春新晴

簾前晴日午鶯語乍啾啾古竹高過屋初梅斜傍階衰

年賸詩酒。大塊載形骸。乘興時移。屨道遙野水涯。

謝南都春松園宮武氏贈墨

調得芙蓉花汁香。雙團貯入豹皮囊。只須墨品論眞價。
好續漫堂仍雪堂。
元香太守最超倫。翠色冷光希代珍。好事石家堪作戒。
斯生只怕墨磨人。

小峰看梅同伊東聿水

青山當面白雲遮。林麓盤陀一徑斜。忽被香風句引去。
傍人籬落看梅花。
誰道東風芳信遲。瓊枝玉蘂乍離披。驀然邂逅空山下。

冰雪襟懷憑汝知。

野店酒帘晴日前。古城春色帶輕煙。一枝斜出疎牆外。
雪樣花明絕可憐。

梢頭正見七分春。妝點谿山風日新。不怪花前裙屐少。
孤芳唯慣伴幽人。

世外逸姿誰共看。隔林一磬夕陽殘。把杯坐巖清香盡。
剪剪風吹醉鬢寒。

花前低嘯且遲留。悵見村園暝色幽。雲趁冷香不離地。
白模糊裏盪詩愁。

悄地春寒吹袂生。梅矜孤艷我孤清。關心花觸烏巾碎。

數步相離緩緩行。
拖筇林下試徘徊。隱隱疎鐘一杵催。滿地花香吹不斷。
斜陽如水嫩寒來。
谿山匝匝玉成圍。聯屐尋芳約不違。最是黃昏郭西路。
袖中裏得暗香歸。
霜竹寒松暝作陰。萬梅白襯暮煙深。旋從報德祠前過。
花氣薰人清不禁。

春寒

紅欄橋下水如藍。稚柳雛花春欲酣。翡翠簾櫳暮寒透。
多風時節又江南。

郊外尋春

煙景賺人去。城南春正中。孤村牧兒笛。一路酒旗風。山
色拖遙翠。林花著嫩紅。韶光入畫麗。點綴自然工。
乘晴試春服。緩步且幽尋。蝶路無人伴。鶯簧和我吟。晚
梅經雨褪。新水帶煙深。好就旗亭酌。遲留到夕陰。

春陰

藥煙吹斷夢初回。時有春寒脈脈催。一院濃陰晚來黑。
珠簾踈地影紅梅。

食蕨

玉膾金齏固異科。鄭公高臥慣絃歌。如今難值黃衣姥。

且憶舊山猿嘯多。

寄土居香國在湯磧

日斷湘西遠。風光入夢來。四時黃鳥嘯。二月白櫻開。詩酒堪頤老。江山屢試才。仍期拋俗累。杖屐又追陪。

題史閣部絕筆拓本後加藤拓川恆忠囑

嗚呼何時何處無忠臣。炳耀汗青長不泯。矧是地覆天翻際。明季有個史道鄰。金粉江山劫餘古。偏安半壁仍樂土。蝦蟆天子自無愁。秣陵花月酣歌舞。廟廊難伍馬阮儔。閣部開府古揚州。四鎮犄角果非計。與誰共梟逆賊頭。旋驚鞞鼓引邊寇。大梁以南無城守。太息中原不

熟志
歷史
敢說

御
初
卷
五

可為忍見同室操戈鬪。江淮當日誰保障。長驅千里胡騎忙。廿四橋頭殺聲起。斑竹園外陣雲黃。西門憑險當一面。矢石雨下迎敵健。同心誓死亦不多。叱咤怒日光如電。其奈睢陽受重圍。疇昔報急羽檄飛。巨礮震天壁皆壞。背城一戰事已非。總兵新降外援絕。裹創而起何勇烈。遺疏且表寸心丹。拊膺痛哭淚和血。城方陷。刎未殊。呆卿終斷舌。溫序尚銜鬚。能守臣職完臣節。不愧堂堂七尺軀。正氣凜然殉家國。天地黯慘日無色。纔殮袍笏為招魂。獨憾不葬孝陵側。十里珠簾一炬殘。屍臭撲人鬼聲酸。今傳揚州十日記。讀來不覺髮衝冠。乃如此。

絕筆儼見忠臣之血性。粗豪健圓自從容。銀鉤鐵畫規
度正。宛然河嶽流時日。星麗于天對之使人歛襟肅起
敬。曼珠衰運亦不遲。後二百年九鼎移。瀋陽王氣一朝
盡。故宮寂寂嘆黍離。燕雀君臣恬無恥。唐侯甘被虞賓
擬。鼠走狼顧苟偷生。何人末路如公比。精爽千古廟貌
尊。喬木斜照靈旗翻。但是梅嶺杜鵑候。花草于今有啼
痕。

雕龍硯歌

硯伊東晨亭樞密所藏。明治十八年四月天津締約
席上即用之云。屬者樞密自撰銘鐫諸背序中詳述

其事又命予歌之

端谿之陽石洗髓。割取一片雲光紫。琢削磨礱在何年。
盈寸方池春貯水。龍尾馬肝今古稱。千金論價漫相矜。
樞密寶此良有以。分明後世足史徵。昨夜漢城腥雨血。
平日別宮貔虎列。變比甘露更倉皇。惜哉鉤黨計終拙。
宣仁門外簇火槍。賊中併認龍旗黃。底事星使膽如豆。
謂竹添公使不賭一死護韓王。屠我居民焚我館。有個丈夫奮
殉難。謂磯林大尉誰雪國辱壯神州。且喜廟堂無遺算。藤公固
是社稷臣。一朝銜詔辭楓宸。當時君亦班兩制。乘槎同
訪太沽春。爭桑釀禍危機促。折衝尊俎盡心曲。至誠感

李中堂翻教箕邦脫藩屬。緬想清初再出師。三田渡
口屹豐碑。尾大不掉邊警急。東海揚塵世運移。輔車相
依交有道。珠槃玉敦締盟好。藤公一笑乃命君。染毫此
硯屬其藁。回首卅年夢裏過。大陸風雲變態多。兩度膺
懲舉不績。容易服得清與俄。旋見竇融獻圖籍。非如孫
皓多罪跡。新錫璽書比諸王。兔青鳴綠霑帝澤。西來羽
檄不堪聞。殺氣幽燕白日曛。萬古英雄藤與李。泉下相
逢憂喜分。靈光歸然君獨健。廉頗雖老尚善飯。終始如
一輸赤誠。報效誓遂平生願。公退時臥翠雨莊。滿地新
陰簾影涼。疇昔識荆好緣在。話到興亡感正長。雕龍嘯

氣雲作縷。硯兮有靈喜得主。汗青須傳卽墨侯。流澤無
疆真千古。

次韻湯河遠洋罷官之作乃寄

憑欄詩思澹於雲。餐盡朝霞與夕氛。擬趁枚乘聯七發。
更隨倚相誦三墳。煙中草綠蝶心穩。雨後花酣鶯語欣。
詩酒從今好徵逐。江湖同調有夫君。

次韻伊東聿水重贈遠洋

臺省翱翔過幾年。挂冠歸臥意怡然。棲遲夢穩郊園裏。
嘯傲詩成水木前。疇昔經綸酬聖世。從來出處繼先賢。
高情逸思誰相匹。應是頭銜署散仙。

病後抽身振鷺班。植筇俯仰遠塵寰。敢輸莊叟知魚樂。
絕似逋仙愛鶴閒。一郭煙嵐堪放眼。滿庭花竹且怡顏。
巖居谷飲遂初志。不待稚圭移北山。

有清居雅集次遠洋近製詩韻

新居何淨潔。韶景眼前回。省識名心澹。相迎笑口開。
鶯聲當午鬧。花氣泥人來。憶昨唱酬日。教吾呼善哉。
時節待啼鵲。擬鋤彭澤田。身稱避賢路。足不到城邊。
卉木經新雨。亭欄拖澹煙。詩成還自笑。一醉枕琴眠。

席上限韻

門徑邃而曲。此間春色多。草心黏蝶粉。花際著鶯歌。因

賸林泉樂。喜逢風日和。若非沽美酒。吟苦奈吾何。
霞氣濃於酒。晚來吟興新。推敲仍一字。傾倒對伊人。
孤磬杳將夕。群花嬌可春。當筵詩競雋。高李定前身。
三月東風暖。鬢霜終不消。花時將醉過。春色引愁撩。
城市燈初上。樓臺笛自遙。雅筵留飲好。寧負可憐宵。

贈勝島仙坡

張里擊鐘仍馬醫。如君清福更相宜。鶯花時節盈罇酒。
鴻雪因緣數卷詩。一自京華初志遂。便看寰宇盛名馳。
廣文今日官非冷。學德又須山斗推。

壽言集句三章

却在人間八十年。天桃牕下背花眠。比於黃絹詞尤妙。
留與工師播管絃。竹內東仙八十集唐人句
張祐徐凝陸龜蒙湯悅

鶴髮初開九九年。衣冠人物故依然。未從方外求丹訣。

花滿車茵酒滿船。遠山耐庵八十集唐人句
袁桷仇遠薩都刺戴表元

六句彈指過雲煙。懶向長安市上眠。千樹桃花萬條柳。

可無清境著閒仙。飯田紫峰六十集唐人句
王文治郭麐黃任厲鶚

暮春雜興

雨後三春盡。予懷正鬱陶。江湖餘醉夢。花鳥禿吟毫。暗
水縈新竹。微風落晚桃。堪來鬢絲冷。偏悔少年豪。

續續續十臺懷古詩

偶閱劉芙初尚綱堂集。有後十臺懷古詩。其未入予

詠者凡四。乃更增之作續續續十臺懷古詩。

卦痕雪後作區區。蒼草滿庭春始蘇。八節三光隨變化。

象天法地看規模。末流既盡潛虛理。道學翻崇太極圖。

歷劫紅羊須卜定。劉興羸蹶費嗟吁。八卦臺

可憐君亦一功狗。却憶登壇意氣揚。割據三分心不忍。

風雲百戰勢難當。無端媚漢殺亡將。何事平齊乞假王。

鐘室銜冤魂魄結。故臺落日笛聲涼。韓侯臺

長沙秋色夕陽遲。偉構猶存歲月移。一自益封辭闕下。

依然望母在天涯。空臺故國紫陽句。楚水湘雲白石詞。

帝子光華長不盡。衡山當面鎮南維。

定王臺

天低疏勒草連空。雞塞龍堆望不窮。十丈驚沙餘落日。

五更戍角起悲風。當時已納名王衆。多事猶論驃騎功。

一出長城枯骨白。單于秋色古今同。

單于臺

甘泉遺蹟鬱嵯峨。想見高臺接絳河。仙掌露寒餐亦好。

竹宮神去恨如何。于今渭水波聲咽。終古南山雲氣多。

未到茂陵腸已斷。沈郎掩淚昨經過。

通天臺

婦言莫聽酒爲名。締得竹林塵外盟。荷鍾乘車連日飲。

幕天席地一心平。何關裴頡著崇有。儘遣嵇康論養生。

臺下東風春正開。桃花如醉夕陽明。

劉伶臺

畿輔煙塵指顧間。冤聲一夜動邊關。誰憐陣外屍填壑。

仍想城西甲作山。王霸爭功龍虎鬪。衣冠變俗羯胡頑。

興亡百代傷心處。樹色秋深血樣殷。

獨樓臺

越瘴山川不可留。幾人能作嶺南游。斜陽孤塔寶華寺。

古木層雲白鵲樓。歸路天邊接荒驛。估帆城下趁奔流。

來時已歷九灘險。久客何堪霜鬢秋。

鬱孤臺

當筵落筆極崔嵬。千古游蹤儼有臺。玉局髯仙詫高興。

微雲學士亦清才。江山添得光輝在。風月儘教懷抱開。

欲往從之魂已杳。浩歌酌酒且低徊。

文游臺

絕勝秦關百二重。陂陀北去控居庸。崑邱日晏歌聲斷。

汾水雁飛秋色濃。幾載昇平初促駕。三邊寇盜復傳烽。
名臣諷諫詩篇在。恨不磨崖記舊蹤。龍虎臺

無題次李又白序韻

歸來如夢又如癡。句成記得當初驚艷時。豈啻笙歌憐趙女。祇應木石是吳兒。依人憨態嬌無比。貼體輕裝瘦自知。枉道巫山天樣遠。嬋娟長見幻中姿。

新詞欲訴此心癡。矮榻幽牕魂斷時。自許吾非醉公子。相逢卿豈醜奴兒。移情爭似鴛鴦匹。傳語儘教鸚鵡知。坐到三更終不睡。銀屏燈繪玉梅姿。

人間徹底是情癡。矧值雲英未嫁時。夜夜琴邊欹髻子。

不入武陵津
誰識桃源路
此是道中人
豈訪得深悟

朝朝鏡裏畫眉兒。却牽長恨吟難續。能締幽盟喜可知。歎息斯生仍薄倖。關心絕似病餘姿。舊事思量奈我癡。為伊惆悵已多時。聰明曾擬虞郎子。貧賤誰憐郭雀兒。雙袖龍鍾和淚溼。一身憔悴被花知。宵宵夢裏頻相見。媿媿婷婷絕代姿。無可奈何終抵癡。傷心最是夢醒時。偶逢西閣彈箏夜。漫學南廂窺牖兒。愁裏光陰雙燕老。病中滋味一燈知。曉牕莫攬菱華照。怕看春來瘦損姿。

星岡茶寮讌集次韻伊東聿水

醉圍紅袖昨題詩。飄瞥無端韶景移。今日苔岑尋夙約。

桐花雨霽綠陰時

勝島仙坡招飲靜園莊次見似詩韻

烏巾白袷笑臨筵容易瓊瑤亦可編櫻筍旋過餞春節
蕙蘭長憶締交年墮煙啼宇聽方遠帶雨殘花看更妍
儘遣吳儂輸一著新詩梨棗早流傳

福澤

桃介成瀨

正行

奧田

正吉

松永

安左衛門

四君邀飲伊東

晨亭樞密後藤棲霞內相

利平

於山口別墅予亦陪

席酒間賦此

晚煙新樹畫簾垂一笑胸襟容易披末學寧輸裴叔則
名卿絕勝鄭當時似曾相識彈箏妓何以報之題壁詩

投轄苦留成爛醉燈痕如水漏聲遲

呈後藤內相

日自扶桑照萬方生逢聖世樂無疆何關西極風雲急
且喜中朝宰輔良憂國多年慣勤苦憐才一意恕疎狂
陪筵今夕因緣在銀燭金尊引興長

席上川上貞奴乞予詩乃書四絕句為贈

雨後紅桃勻醉臉風前綠柳綰嬌鬟羅家有句堪移贈
羞殺新豐謝阿蠻

一曲新聲舞影單翩然飛履又翻冠要知粉墨登場日
容易傾都喝采看

采

秋碧吟廬詩錄 卷五
宵宵寡鵠不成眠。魂斷迢迢離恨天。歌扇舞衫仍似舊。
絕憐花底出陳圓。
綠譜紅腔最有情。到頭妙技是天成。嗟吾四十鬚眉老。
輸著裙釵早擅名。

杜鵑花

杜鵑昨夜一聲飛。血染山花潤未晞。簾外拋錢憐綺艷。
殿前拜賜有光輝。廢園石黑含殘雨。絕壁苔青住落暉。
翻恨道人殷七七。無端劫火鶴林非。

佐藤六石見貽賴山陽題詩了教師舊笠圖卷影
刊乃用其韻賦二首酬之

白足高僧真解脫。何須徒參清楚末。詩酒平分誰共游。
有個竹扇山陰客。依然一笠似月圓。恰好屏風畫林樾。
蕭齋每拈心字香。嗜古與世亦乖刺。
當筵想見舞渾脫。會心詩非強弩末。寧輸南屏有濟顛。
醉蹟須屬青雲客。聞道沙河閱滄桑。十一樓廢賸叢樾。
獨賴此卷記風流。萬千看了顛不刺。

輓李又白

又白有無題疊韻二十律。介其宗人幼安。楷年千里寄
似索和予先得五首。姑塞責。尋欲續稿。必如原數。今
聞其訃。悲悼不禁。乃依舊韻賦此。以誌摧琴之痛云。

影事前塵情太癡。一生只是斷腸時。誰將落魄憐公子。如此風懷亦可兒。金谷鶯花魂所住。玉谿嫡嗣世皆知。無端噩夢仙凡隔。仍憶當年張緒姿。

初夏函山雜吟

舒嘯倚雕欄。詩情方暢適。林端宿霧殘。鵲後山逾碧。芙蓉媚新霽。當面峽天開。獨作凌虛想。振衣望嶽臺。雨晴初旭紅。餘潤在林麓。峭碧看分明。千山試新沐。飛泉白拖練。濃綠颯搖風。絕壁鐵光黑。鵲花隨處紅。流汗霑衣盡。芒鞋蹋石稜。拋筇時一掬。巖溜冷於冰。生路都忘遠。行行發興新。一峰當樹隙。秀色宛迎人。

橋邊樵路歧。側有地藏佛。病葉白於花。溪風忽披拂。濃陰遮赤日。石氣入衣涼。古道鞋痕少。松花遍地黃。煙樹平群壑。鐘邊夕照沈。杳然拖暝色。鵲語入山深。抽毫頻苦思。難續柳州筆。水石似黃谿。林丘更蒙密。

做廬小集同上村賣劍谷村映雪康春日井柳堂

萩原錦江八十吉限韻賦此

擺脫浮生習。閒看夏景催。殘花傍階在。倦蝶繞簾來。一笑市朝隔。相逢胸臆開。酒邊唱酬好。諸彥盡清才。莫嫌儒食素。野菽滿盤香。垂老因詩苦。兼之爲酒狂。隨時趁鷗約。無分躡鵷行。高唱者誰子。尊前首一昂。

旋過牡丹節。暑服翦蕉紗。久矣名心盡。漫將詩句誇。孤
鶻隔煙叫。雙燕受風斜。談笑消長日。新醅爲客賒。
卸得陳家榻。翛然萬慮寬。鶻花紅滿砌。竹色碧當欄。劇
飲醺方足。遲吟字始安。吾徒不相管。人海有波瀾。
地僻迎修景。清筵樂若何。一欄紅藥綻。四面綠陰多。縱
酒陶元亮。論文劉彥和。胸中無芥蒂。逸興足高歌。

次韻答諸君見贈

願濟世澆薄。寧爭翰墨勳。閒居守吾道。獨力任斯文博。
物朱遵度著。書揚子雲何。何時復純古。乃報聖明君。

本門寺題壁

群松擁一岑。絕頂試登臨。鐘磬傳清響。樓臺帶薄陰。浮
生仍有漏。淨境抵無心。風榻翻經罷。謝公蹤可尋。
排難唱新義。祖師功德長。勝因一清淨。法力是金剛。日
月照蓮界。煙嵐籠雁堂。遺蹤儼千古。壇上雨花香。
紺園無暑熱。倚檻夕陽移。蟬語簸深樹。荷香溢曲池。諸
塵轉不盡。一夢醒初知。壁上先留偈。重游囑後期。

伊東聿水過訪喜賦

連旬不相見。一日抵三秋。鴉宿林容靜。螢飛露氣幽。奇
書堪玩賞。好句更賡酬。聊貯盃中物。縱談今夕游。

看荷

雨過斜陽麗。荷花荷葉齊。橋橫溪上下。魚戲水東西。秋
意催涼酌。風香入醉題。孤亭小於舫。曲檻亞波低。

夏晚雨後

白雨驅雷去。餘炎剗地收。一天涼欲月。萬木韻于秋。賴
有琴尊好。殊兼枕簟幽。佳期星夕近。河漢鵲橋浮。

聿水招飲席上率賦似岡本

勇

岡野

久胤

二學士

廿載重相見。依然面目真。青雲有此客。白屋奈吾貧。苔
氣不離地。松聲還健人。清談忘夜永。胸宇自無塵。

涼夜

竹樹露深涼欲聲。湘簾半揭月初生。階前乍動秋之氣。

著個新蟲聊復情

次福井學圃鵝湖詩韻乃寄

雲波諏訪好。一檻俯鵝湖。殘照隔林木。嫩涼生渚蒲。惟
憑酒膽壯。不遣旅情孤。最憶月明夕。撈舟煙水區。

李幼安招飲賦似

君才勝短李。歡晤了良因。臨水簾無暑。當筵燭似人。每
矜詩酒健。便見性情真。時事非蒿目。風雲一愴神。

枕上偶得

小鑪煙燼有餘薰。八尺風漪碧篔簹。蟬乍一吟蟲乍咽。
半宵露氣自平分。

池上曙樓與武島羽衣

又次郎

金子楨園

元臣飲

步出招提境山樓試一過鐘聲韻林樾秋色滿關河獨
覺阿羅漢浮生乾闥婆涼風簾自撥落日下陂陀

媚姝曲

交趾安陽王卽位三年得金龜因其教築螺城于越
裳龜臨去脫其爪付王以爲弩機名曰靈光金爪之
弩四十八年秦始皇崩中原大亂趙佗大舉來寇營
於北江王以弩射之佗敗走通使講和王大喜却割
平江以北屬佗佗遣其子仲始入宿衛與王女媚姝
私通情好日密未幾仲始誘女觀弩潛毀其機託言

省覲將去謂女曰若兩國失和我來至此如何得相
見對曰妾有鵝毛錦褥坐臥不離到處置毛於歧路
以誌之五十年佗復攻王王圍棋笑曰佗不畏吾神
弩耶佗軍逼城王舉弩已折矣乃坐女於馬上攜之
南走仲始認鵝毛追急王至海濱連呼金龜速來救
我龜浮出水面叱曰乘馬後者賊也盍殺之王拔劍
欲斬女女祝曰忠信一節爲人所詐願化爲珠玉以
雪此恥王竟斬之血流水上蛤蚌含入其心化成明
珠王持七寸文犀入海去仲始追及之見女旣死抱
屍慟哭歸葬螺城屍亦化爲玉仲始悲想不自勝尋

投井死後人得東海珠玉以井水洗之愈光瑩事見
大越史記全書雖荒唐甚亦推趣絕予乃詩之以廣
其傳云

魍魅潛逃哭聲絕祭天晨灑白雞血
羈縻出壙碎成灰七曜山邊妖霧滅
五嶺煙嵐徼外賒居然形勝壯京華
螺城百尺自透邇幾處丹樓麗似霞
蠻花犴鳥饒生意珍重當年江使瑞
靈光金爪固無儔玉靶銅牙猶未試
何來鐵騎忽相侵殺氣奔騰日色陰
封豕長蛇紛滿地風聲鶴唳更傷心
潛機一發萬人死始信天弧真可恃
十里連營屍似山暮潮嗚咽北江水
綠車早到禁門前

炎方舊

載得紅顏美少年可憐子楚甘爲質
玉帛朝回罷戍邊從此蘇臺忘日晏
趨廷無復伍胥諫鴻溝一劃版圖分
縱寇錯貽心腹患深宮有女勝吳娃
呼作媚姝名亦佳整容閒對青鸞鏡
扶鬢斜簪紫燕釵當初邂逅通眉語
綺戶雕欄難獨處可無鵲駕趁佳期
絕似鳳臺迎舊侶碧紗低貼鎖瑤牕
小閣更闌又翦釵相憐相愛心如一
爲雨爲雲枕自雙朝朝惜別情懷惡
帳裏啼妝脂粉薄何日更尋秦晉盟
新聲好譜房中樂驪駒明發去忽忽
羅袖欲霑珠淚紅豈識蕭郎禍家國
祇傷偕老願成空花月姻緣歡未畢
千愁萬恨總難述雙生雙死了前因

雷聲汗林

紙如雪

玉注小字通同夜

冰骨早如好

此誓不渝如皦日。院落深深簾四垂。攢眉心事怕人知。
角枕錦衾嗟冷臥。離鸞別鳳有餘悲。玉樣溫存花樣瘦。
含嬌含態却勝舊。夢裏相逢覺尙疑。悄聞銀箭催宮漏。
狼弧虐燄夜連晨。半壁江南又戰塵。便知句踐久嘗膽。
破竹難當勢絕倫。到處投降爭納土。紛紛棄甲拜新主。
錦繡山河落照低。鬼門關外急鞞鼓。選舞徵歌仍宴游。
一朝王氣漠然收。殘棋覆局倉皇起。神弩無功萬事休。
四面殺聲門不掩。城頭赤幟隨風颭。雕鞍扶上小嬋娟。
虎豹叢中親履險。每臨歧路散鵝毛。萬馬蹴空人叫號。
途窮容易追奔及。十丈銀山湧亂濤。深閨既釀兵戈變。

不怪金龜嚴呵譴。此際都忘骨肉情。刀光一片閃如電。
賸膏殘粉委塵埃。忍見名花風雨摧。冰魂雪魄誰呼返。
終古沈冤歸蚌胎。七寸文犀喜神助。須臾龍馭海中去。
天吳拜跪浪婆迎。託跡蛟宮最深處。臙脂恨血漾屍香。
金雀鴟鬟看舊妝。故國歸來悲紫玉。殯宮當日哭同昌。
興亡轉瞬浮雲改。虎視龍驤知幾載。三市銅駝臥地殘。
五陵石馬嚼煙在。薤歌唱斷不堪聞。肯信碧霄仙路分。
喪車徑到北邙上。賸得草間三尺墳。若有人兮繡牀側。
愛而不見淚霑臆。無端一別隔幽明。釧約釵盟費追憶。
斜月臨階霜氣寒。凍痕纔合井生瀾。腸中宛轉轆轤急。

翻想夜臺魂夢安。從來哀樂眼前換。矧是今生逢喪亂。
怨恨深於恩愛深。孽緣千劫終難斷。一念分形萬億軀。
玲瓏總似致區區。縱令精衛能填海。玉不自言泉不枯。
錦水樓雅集分韻賦似佐藤六石

矜道一身無五勞。雅筵例是引醇醪。滿江煙水鱗聲緩。
隔岸樓臺燈火高。肯擬樊川嗟薄倖。須知淮海負餘豪。
詩成嘯倚欄干角。捲起西風百尺濤。

木芙蓉

菊前荷後擅佳名。疎碧稠紅最有情。臨水依稀初日澹。
當簾搖曳落霞明。山中幽興憐摩詰。塵外高蹤憶曼卿。

却遣君王慣游醺。秋光繪出錦官城。

皆香園雅集分韻

又趁佳期臨雅筵。例憑文字證閒緣。籟林蟬語秋陰散。
倚檻葵花夕照妍。檀板銀鬢憶前度。酒悲詩瘦感中年。
當壚卓女今安在。回首西風一黯然。

吞海樓賦似高橋月山

登樓好續去年游。煙水依然月色幽。佐酒雛鬟皆妙選。
能詩佳客是名流。關心故國尊鱸節。極目長天鴻雁秋。
洛下風塵拂衣未。與君醉裏話鄉愁。

輓森川竹篔

一自論交廿七年須知膠漆未為堅同岑臭味談非俗
絕代風流筆亦仙白袷每逢吟榻畔緋衣忽到病牀前
摧琴餘痛禁難得矧值蕭蕭落木天

倒屣而迎命駕過詩徵酒逐樂如何名門奕葉丰神貴
浮世行藏閱歷多疇昔傾心張叔夏一生低首郭頻伽
白鷗浩蕩尋無跡江上西風嘆逝波

冰心一片與君同悵絕音容轉瞬空夙慧寧知賦詩苦
妙年既見讀書功生前瘡鬼頻為崇天下才人例自窮
唯有師恩堪記取後山竟不負南豐

析疑訂謬苦心存嚼徵含宮仔細論君補訂萬氏舊本為詞律大成附以元曲小令好趁

嗜音姜白石翻思傲世沈青門瓊瑤猶賸筐中稿絮酒

難招冢上魂俊賞填詞玉梅令某歲春初過訪時軒前梅花早開席上度此腔見似秋燈影暗

舊題痕

無愁可解酷相思名共詞回首高才又數奇已痛范滂猶有

母絕憐伯道竟無兒儘教蜀妓紅牙拍譜盡梁郎白雪

詞成都妓女歌君詞者頗多大野遼鶴游巴蜀而歸所語如此伏雨闌風秋欲老斷腸花瘦倚疎籬

金枝小峴道三招飲此夜中秋無月

殿山有個讀書樓賓主相逢作唱酬風雨頻年今夜月

江湖滿地一身秋好從文字迭輸膽矧復琴尊堪解愁

四壁新寒成醉未悄聞玉漏半宵幽

大風行

丁巳中秋天昏黑。雨氣滄溟藏桂魄。不及好事趙知微。當筵談笑強爲劇。歸家一睡誰呼醒。婦豎繞牀無顏色。天帝怒鞭毒龍奔。飛廉咆哮急相逼。突如韓原虜晉侯。死士衝圍成偉績。復如城濮迎楚軍。曳柴僞走橫攻擊。慘如馬陵殺龐涓。萬弩齊發鳴飛鏑。又如長平殪趙括。四十萬卒坑底泣。猛如項羽救鉅鹿。呼聲震動十餘壁。忽如光武克昆陽。虎豹股戰川上溺。壯如周郎焚魏舟。雷鼓進兵驚濤立。迅如李愬襲蔡城。衝枚疾驅爭俘馘。旋風頻簸屋瓦飄。環舍堵牆倒投擲。參天老樹訇然摧。

兩耳欲聾轟霹靂。世界疑墮龍漢劫。萬家燈滅夜如漆。雨脚斜飛亂于麻。屋漏戶穿衾裯溼。五更以後勢始衰。東方將白天宇闕。魍魎匿雲霾消。杲杲紅日射簷隙。忽聞路人狂呼過。城東一帶海潮溢。民屋漂盪蔽水面。宛在中泚屍狼藉。嗟乎吾廬何足言。俯仰乾坤意悽惻。既無米價似淮南。矧是四野傷黍稷。災異雖未累聖明。蒼蒼者天誰能測。可憐無家兒作群。嗟來之食猶難得。既望月色皎明。醉後賦此。

百尺高梧倒不起。疇昔風雨暴如此。忽有雷威叩我門。慙慙償直詫材美。是夕既望月猶圓。無復樹影當檻前。

遺童沾盡市橋酒。捲簾飽賞秋光妍。長安萬戶笙歌寂。
露脚灑衣蟲鳴壁。鄭俠流民新入圖。聞道官家又發糶。
醉後意氣矯不群。一笑訴貧有細君。明日更賣長門賦。
黃金百斤與卿分。

紫雲硯歌用土居香國韻賦謝佐藤猊巖

谿上風雨龍騰擲。何人踏天剖懸石。玉德金聲固異常。
一經刻琢發光澤。色如馬肝滑如膚。乃見中虛而外腴。
紅閣題詩夜磨墨。碧牕點易曉研朱。爾我周旋情一片。
武人愛劍未若文士雅愛硯。抽毫仍用心。方池幾寸深。
最是清氣磅礴午蕭寂。絳紗帳底獨歛襟。來自窮髮天

低處。佳贈絕勝千金助。他年瀛海放仙槎。楚水吳山萬
里携個紫雲去。

鹿角兜歌爲阪川翠濤作

阪川氏祖宗重事加藤公。征韓之役從軍轉戰先至。
會寧府虜二王子。豐太閤賞其功。特賜此云。

阿虎將士猛於虎。東來萬騎如風雨。風雨颯沓到漢陽。
陣前英姿壓賈豎。鐵嶺大霧曉斫營。一炬鏡城化赤土。
六鎮鼠走唯空屯。幾處金湯唾手取。會寧府外急鼓聲。
夜叉來兮止兒啼。貌似夜叉心菩薩。恩威並行撫群黎。
直北遠臨女真境。騰驤鐵馬振鬣嘶。凱歌聲裏軍容肅。

遙指芙蓉看不迷。君家曩祖真英傑。當日先登探虎穴。
 手縛兩兒驍名高。轅門拜賜駭同列。且期長驅下義州。
 可憐韓王膽破裂。一朝講和急班師。想見積憤肺肝熱。
 轉瞬又過三百秋。先皇神武宣鴻猷。金尺山河歸版籍。
 地下群雄志初酬。家乘須補國史闕。歲時伏臘感何休。
 前賢唯賦阿速胄。梁星巖有博多松永子登家觀阿速胄歌阿速即蒙古別名功名別有鹿角兜。

野望

遙指虞淵白日淪。數聲征雁更傷神。連天草木三秋晚。
 四海風煙一病身。泉水出山何免濁。豺狼在野莫為鄰。
 紫萸黃菊併携酒。須趁明朝落帽辰。

長白山歌為松田學鷗甲題其游草

長白之山盤踞千餘里。崑崙崆峒培塿耳。南接渤海北
 挹婁。餘脈一支縱貫八道長。逶邐庫勒完達共山名如列屏。
 瀋遼東劃千山。名山青重巒複嶂起伏爭向背。嶙峋峯巒
 無定形。譬之花心抽瓊蘂。天半五峰戴雪白。娉婷熊羆
 成市豹臥霧。大麓林莽疑無路。唳鶴冲天秋始晴。曙色
 流入白樺樹。黃花遍鹿蹊。峰稜可飛步。彩霞圍繞石砌
 臺。丹崖碧澗多奇趣。頂有周四十里之一湖。山上有潭曰關門然近清人稱天池韓人稱大澤又龍王潭乃是蜿蜒神龍之所都。峰尖倒涵風盪漾。動影裊
 窈波紋鋪。欲問三江鴨綠混同圖們發源處。南北分流百泉趨。尻

術

為輪神為馬。下瞰西極廣都野。翩然來駐縹緲之絕巔。
 墮謫人間胡為者。手排穹窿叩天閭。雲之君兮紛而下。
 山海經云大荒之中有山曰不咸。敷雲洩雨之奇。六字見遊時祭告文
 駭愚凡仰止其高載金德。金世宗冊封文曰厥惟長白載我金龜仰止其高實惟我舊邦之鎮其全文共載于盛京通志累朝
 册封存玉函。布爾里湖飛神鵠。鄂多里城控朔漠。奄有
 四方肇帝基。只期與山長住著。絕勝楚客澤畔吟。漢槎
 一賦尤淵博。吳兆燕字漢槎順治十四年舉人以科場事謫寧古塔會有封祀乃著長白山賦又有封祀長白山二十韻之作其見秋笈集壯游他日
 又試才。渭仁筆力混沌鑿。方象英字渭仁康熙十六年六月隨內大臣覺羅武登山作長白山記今載于吉林外記而覺羅武奏狀見池北偶但因清韓接封疆。千秋疑案費
 商量。瞻星客去露臺廢。朝鮮英祖四十二年五月徐命膺登山觀測緯度定界碑殘蘚痕荒

左

菊苑奇歷險

家荒概出

西陽修

拙出官陰

家荒概出

西陽修

康熙五十年五月烏喇總管穆克登以韓人為導。登山建清韓定界碑沿圖們江至雲頭山城而歸。每道士門形勢有沿革所以
 檢覈缺精詳。朝鮮李太王二十三年之交復議長白國境其詳見通文館志紀年續編終古天柱屹然豎不
 管兩國閱興亡。故人夙習測地術。平生職守無遺失。緹
 幽鑿險飽辛艱。風餐露宿百餘日。飢炊粗糲渴掬泉。手
 足胼胝髮不櫛。山川脈絡始分明。寫上輿圖功方畢。餘
 事又矜詩筆雄。摹繪情景變不窮。要與吳方成鼎峙。元
 精耿耿迸星虹。茲山既入新版籍。扶桑日照霞氣紅。早
 晚望秩應趁例。更製迎神送神曲。曲工蹇予遠游猶有
 待。欲從鴻濛問真宰。吁嗟乎何時與君探河源。九曲徑
 到星宿海。

月下菊

纖藥層英耿出牆。西風一夜帶晶光。歲之將暮花逾潔。昏以爲期露有香。疇昔長安分粉麪。何人栗里共壺觴。前身只合瑤池在。月下依稀看澹妝。

鷗社大會席上。限韻。

綠尊紅燭勝前游。笑指題詩在上頭。十二萬年唯一夕。錦袍須醉大江秋。

次佐藤六石韻

新詞唱徹韻冷然。笑上風流翰墨筵。隔岸煙低黃葉外。倚欄人在白鷗前。千秋雅頌報家國。一片性情同聖賢。

最是平生酒無量。餘歡卜夜棹觥船。

好文會席上。追憶丸山松廬鹽井兩江二子。

酌酒西樓上。招魂向夕陰。伊人不可見。新雁忽傷心。一別判生死。達觀無古今。坎軻吾欲老。又嘆鬢霜侵。

嘉禾篇贈安孫子鏡峰。

黃雲黏天兮光照九阿。甌婁滿篝兮汗邪滿車。晞而春之兮玉粒嗒嗒。清流之稻兮蔑以加。供萬人之觀兮內使嗟。從今饒御兮用之靡他。瑞穗之國兮風日清和。稼穡務農兮帝所嘉。君家之慶兮洵無涯。

輓佐佐醒雪。

終生甘力學。聲譽遍江湖。鍊句調皆古。論文心不粗。雨
從前夜暗。人與九秋徂。旅櫬西歸處。關河一雁呼。

橫川三松過訪喜賦

笑揖信中客。鄉音如盡情。琴尊初會面。湖海夙聞名。秋
後日偏短。詩邊譚正清。重來莫違約。聯襪趁春晴。

岡崎春石壯過訪同賦

吾廬幽且潔。對坐適吟情。禽語磬同響。鑪煙雲樣生。竊
慙才力薄。一笑利名輕。花月麗都裏。每尋壇坫盟。

同福井學圃奧山竹香敏過日比谷公園詣品川

海晏寺遂飲鮫洲旗亭

滿園裙屐簇。勝賞惜殘陽。樹已經凋瘁。菊猶留靚妝。風
懷欺李白。時節又橙黃。旋向鮫洲路。煙波引興長。
海上名藍古。入門塵慮空。飽看泉石異。不與市朝同。曲
徑苔痕碧。連崗樹色紅。低徊堪墮淚。十丈賸碑豐。
縱目寥天濶。汀煙取次緘。斜陽烘漲海。遙嶼住歸帆。鬪
酒心初愜。題詩骨不凡。莫將秋後淚。重溼舊青衫。

狂花

黃四娘家昨賦詩。微暄菊後輒離披。貧妻插鬢還相好。
癡蝶留魂却不知。隔竹聖垣霞氣薄。臨流茅店夕陽移。
從來愛唱藏園句。也是人生晚達時。

勝島仙坡招集靜園莊作展重陽會酒間以吳穀
人獨往園詩韻課一律予乃賦此

豪氣豈輸秦少游例從杯底闢丹邱橙黃橘綠天初霽
霜藥風莖菊賸秋便擬東南逢勝餞依然西北有高樓
重陽却覺展來好醉後只須佳句留

延陵紅石硯歌土屋琴坡政朝囑

右軍風字硯其色赤似朝霞絢君家之珍約略同瑪光
發爛雙目眩穀理綺文自圓勻鬼工雷斧巧如神雕鏤
依然含奇彩彷彿雲龍噴水現半身吾邦赤馬關彼土
羚羊峽似而非者亦偷名輸著此硯藏鐵匣君不見高

千穗之峰碧崔嵬五個瀨之水綠潏洏延陵城外多洞
壑隨處雲骨嶮作堆憶昔武尊一劍窮絕險容易南荒
妖氛歛遺跡今產石殷紅莫是梟帥頸血之所染誰剖
崑璞加礪硯終古琳腴鍾秀靈几席得此添風趣一縷
雲氣溼牕櫺蕭齋晝靜吟不已磨墨凝視黛光起君詩
雄峻須如高千穗之峰汪洋須如五個瀨之水

黃莘田遺愛硯歌金枝小峴囑背鑄七絕一首曰青谿白石水雲鄉
古處都應染古香好共鑄華題小字

第三神女玉卮嬾今見本集者
改前三句此蓋爲其初稿矣

黃侯好事世無匹紫玉雜陳環堵室匾額已署十硯軒
公餘把翫消長日早時政績聲名揚

余文儀黃莘田先生傳性好硯嘗
購得古硯十枚築十硯軒貯之

已

露冕行春向殊方。恰值端谿開坑節。拾取純璞橐中藏。
區區鶴俸非所顧。無官始得林壑趣。茶餘客話辛四會以耽硯効歸絕代紅妝
解憐才。又似樊素侍白傅。榕城詩話侍婢金櫻明艷絕世妙解文辭兼工絲竹物以人傳卽千
秋。唯憑遺愛憶風流。問君何從獲此硯。幾欲奪去心便
羞。聞道王家澄泥硯。春渚記聞王衷天誘所藏澄泥硯正紫色而堅澤如端谿石佳名當日寰宇遍。
後來有個玉卮孃。汾水遺法看精鍊。既與端石競其奇。
纖纖素手懇捧持。想得紫藤花穠處。醉倚紅欄寫烏絲。
香草齋集中有看藤花十絕嗚呼名士硯同美人鏡。終年摩挲以爲命。明牕
淨几不暫離。愛而抵死亦非病。君今與硯了夙因。合是
莘田之後身。借花樓中春長在。未信金櫻無替人。古彩

寶

斑剝墨暈綺。綠色烏文差可擬。依然堅潤玉琢成。圓池
能貯一斗水。醉餘狂草學張顛。龍蛇起伏筆無前。矧有
新詩抵白雪。書破山陰十萬牋。

芳野行宮瓦硯歌清修關澤霞菴囑

頭白老烏啼且飛。紇干山雀終不歸。于今石角皆北向。
亂峰矗天住夕暉。禁籟憑高帝陵古。松風檜雨翠四圍。
蒲牢一吼林壑震。落花如雪灑禪扉。依稀此景已惆悵。
手撫舊物重歎歎。說到南朝傷心史。五十七年一夢非。
西鳥東魚成陳跡。前狼後虎頻遭厄。柏梁高宴歡未終。
泉鳩慘禍冤難白。白馬青絲動地來。臺城作囚悔無益。

乾坤板蕩慘兵戈。殺氣蔽天故宮隔。一朝僧屋爲皇居。
瓦兮當時色猶碧。定聞群臣哭鼎湖。御牀按劍痛何劇。
神器所存燦日星。矧賴祖宗在天靈。花近玉階千官肅。
偏安不是小朝廷。無奈賊騎犯疆急。綿竹戰苦野血腥。
劫火焦天行宮燬。瓦兮入土土花青。南風不競王氣黯。
銅駝荆棘涕淚零。講和猶重父子禮。傷心莫唱雨霖鈴。
瓦兮偶然出塵穢。免與山河同破碎。未央宮闕銅雀臺。
一種淒涼閱興廢。鑄鏡加工圓且窪。不似彪文弄媚態。
敗皮弊網難與儔。真個當用無罣礙。千金豈換希代珍。
幾人傳玩苦相愛。如今詩客共周旋。亦是微物有顯晦。

汝貌既古汝心剛。不關陵谷與海桑。浩然之氣憑依在。
披匣每驚色澤蒼。從來豎儒好立異。顛倒正閨素綱常。
幾多毅魄悽不瞑。闔國士風亦沮傷。願借此硯揮鉅筆。
堂堂大義好闡揚。要續當年外史氏。警世文章光焰長。

王夢樓破硯歌落合東郭囑

東郭几上片雲膩。硯一寸許秀而異。把翫多時仔細看。
分明側鐫夢樓字。聞道小湘銀星品稍殊。不甚發墨宜。
調朱。此硯石質依稀是。贖見餘滓暈珊瑚。不知何時又。
何用。以臆度之其庶乎。或是棲遲年。碧牕晝靜點周易。
不然臨池前。細心雙鉤摹墨跡。或是止觀齋。口誦梵語。

著箋釋不然納書楹手編曲譜注工尺試舉此問硯硯
兮不能言我縱代言又何益莊生齊物怯重論憑君十
襲永爲寶居然名士遺愛尊殘破猶想有精怪只須天
壤之間千古存

送山口槃澗正德歸土佐

幼時隨先子鷹城三歲留朝臨鏡水釣暮向筆山游一
去關河隔夢寐牽暗愁須知君桑梓在吾卽并州明發
君拂袂千里歸興幽渺渺煙波穩瞻望南溟舟當年悲
埋玉伏臘雙淚流來日荒邱上爲吾弔松楸亡妹墓在高知城外
潮江山不掃已三十

矣年

爲福田眉仙題其畫五首

水墨開生面有個王摩詰米點與李皴後來法逾密舊
套須打破寫生重直筆苟引人入勝畫家能家畢卽今
有眉仙跌宕而真率楚江蜀棧奇紙上靈境出楚蜀山水冊
昨繙石湖集夢到峨眉巔今展眉仙畫煙嵐紛眼前振
衣山無數每驚天上仙獨憾游有限瀛海未放船君筆
兼硬軟飄飄欲高騫山靈須相待早晚吾詩傳大峨十二景
鬱鬱紫栢山洞壑清寒極孤磬嵐外微斜日巖下旻臺
殿競高低金碧耀淨域一潭龍氣深千嶂入昏黑我慕
張子房辟穀此游息精靈萬古存花草有生色紫栢山圖

南漕平漲碧。清晨溯空舸。新灘罩子歛。起撥舟暫停。擗鼓催合宗。進盪心未寧。烏毫候深淺。石是滿天星。露尾纔送險。打寬勞峽丁。又怯人鮓壑。灘腮帶龍腥。峽江湖航圖大抵每句用行船

口號
俚語

南信吾桑梓。久聞中房勝。今日展圖看。翛然動幽興。峽勢隨步蹙。崖腹通樵徑。瀾瀾一水流。杳杳萬山暝。此景攝入詩。韻如古鐘磬。願得東道人。溪壑探奇磬。中房道中圖卷

蠟梅

忍寒終不嫁東皇。玉蘂檀心殿衆芳。一夜雪飄分積素。數枝花拆點嬌黃。曾經膏沐添清格。却謝鉛華做薄妝。

夢值坡仙獲奇句。依稀枕上遞幽香。

瓶梅

數枝瓶裏始開花。住著詩人不出家。半夜燈痕白於月。銀屏繪得小橫斜。

伊東聿水招飲席上同賦

盍簪談笑好。可以餞今年。酒氣消寒玉。燭華邀夜妍。逍遙已悟理。文字亦通禪。來日函山麓。聯吟續勝緣。

歲晚書懷

鏡裏慣看飢鳳姿。撐腸書卷與貧宜。一寒且怕冰霜緊。垂老偏驚歲月馳。輦轂詩人無氣慨。江湖酒伴孰心知。

窮餘始信才堪用。大雅扶輪措我誰。

次巖溪裳川詩韻

落魄慙輸雁塔人。每瞻佳氣闢鉤陳。須教贅叟爲歌頌。
莫向長沙問鬼神。終古功名同畫餅。誰家庖屋有奔鶉。
今宵斗酒年堪餞。併洗胸中萬斛塵。
結跏穩坐早梅前。一悟是非初達詮。泉石聊教世情減。
村園常喜物華偏。林逋隱逸唯憐鶴。王素清高解賦蚊。
悔殺黃衫曾負俠。笙歌例在酒家眠。

秋碧吟廬詩鈔卷五

秋碧吟廬詩鈔卷六

東京 久保得二 天隨

戊午

海邊松

潮氣晴拖翠色稠。五更海旭挂梢頭。雕題黑齒來王日。
須繫炎荒萬里舟。

函山新春次福井學圃韻

歲首新晴麗。紫霄初日開。仙山慣來往。高閣例遲回。冰
雪淨詩思。功名歸酒杯。籠紗題可續。舒嘯興悠哉。
情味喜同臭。記從相值初。一貧仍賭酒。多病倦傭書。冰

合澗聲斷煙消林影疎更期秋霽日聯屐賞紅於

鎌倉訪田邊松坡

新

雞犬孤村靜林園午景圓相逢原舊識一醉恰新年詩
國茲稱霸樓居例抵仙湘南春乍動傍檻早梅妍

和田塚懷古

田竇相移奪兩雄不竝立子姪雖無謀誠忠原性習傷
哉源氏衰外舅任宰執勢燄何駸駸將軍避席揖既墜
我家聲又剽我封邑與其取誅夷不如試掩襲舉族鞍
馬起譬如龍破蟄非敢抗幼主梟賊兵可戢煙塵漲天
黃殺聲捲地急力戰夜連晨腥血遍原隰可惜時不利

拊膺空嗚咽縱有三郎勇衆寡終靡及積骸歸一塚浮
圖石岌岌于今賸香火莫遣鋤犁入茲來感廢興遺事
誰綴集七百星霜古臨風增忿悵想當秋夜深行路露
厭浥長松捲黑雲迴飈正欬吸月色墮煙暗草間螢燄
澁獨碣搖欲倒群鬼一齊泣

五谿閣涵詠詩社新春小集分得薄字

欣然整衣冠雅醺踐幽約舊雨情已諧新知亦多樂縱
談曠古今此心拚落落百憂乍一消白雪歌可作溫柔
敦厚旨願濟世澆薄每聞鄭衛音輒爲數日惡晚來風
以寒霜氣透紗幕研席清欲絕初梅香漠漠綠波酒如

淮盤上列海錯只須永今宵翦燈細細酌

山居

山中猿鶴是心知日夕遣懷唯有詩一水以南春合遍
老梅花白臥牆枝

酒間贈堀口長城九萬一併題其詩卷

客自瀛西返尊前共嘯歌中年記鴻雪大陸值兵戈報
國一心赤憂時雙鬢皤興亡無限恨痛淚入詩多
論到安危局對君肝膽披幾人曾目攝舉世少心知莫
負青雲器併傳白雪辭酒酣還劍舞四壁燭華移

伊東晨亭樞密屬題文衡山疎林水閣圖集宋人

詞句

一重水隔一重山歐陽修人在三秋爽氣間趙君舉不泛千觴應

未醉柳永披襟散髮最宜閒楊无咎雁背夕陽紅欲暮周邦彥長安

回首空雲霧毛滂自古功名屬少年陸游此身甘被煙霞痼

欲將心事付瑤琴岳飛一夕佳期兩意深蔡伸玉堂金馬

何須道胡銓只願君心似我心李文儀

杉田看梅

瓜皮艇子艣聲柔滑笏春潮碧似油隔岸梅花晴日午
微雲低罩一村幽

酒旗影閃野橋南隄下輕舟隄上驂一路風香花遠近

惱人煙景似春酣
花到半開鶯未知
一枝冷艷隔疎籬
幽香好使詩脾淨
解事春風細細吹
一帶村園午日晴
前山時見白雲生
梅花固是舊相識
笑立風前還有情
林麓花開疑雪斑
併將水竹闢仙寰
孤寒抵死足同調
我是詩人陳後山
嫩香吹入午風勻
澹拖煙光古寺春
數點如星花的爍
翻從疎處看精神
微風霽日鳥聲和
脈脈寒香隨處多
深塢小山高下路

短筇徐撥白雲過

藤前菊後擅文譽
憶到勝名傳世初
悵絕劫餘花漸少
笛邊人立夕陽墟
詩情酒興一時濃
如此幽期不易逢
忽自花邊催暝色
隔煙敲斷上方鐘
移屐花前佇立長
暮寒如水月昏黃
歸家恐被細君妬
衣上何由偏有香

夢游月瀨

清香夢裏結成詩
煙景依稀覺尙疑
欲往從之隔流水
驀然相見倚疎籬
諸天鐘暝鶴飛疾
一崦雲深月上遲

記得花神頻囑付。明年杖屨莫愆期。

春江

一櫂煙波夕照昏。又知時節及河豚。楊花如席東風急。鋪到漁汀劃漲痕。

次福井學圃偶拈韻

達觀人界隘。尙友古之賢。事局自頽爾。功名亦偶然。但憑脂粉假。能遣蠲黷妍。明月常盈缺。何須問老天。

齋藤拙堂風字硯歌。伊東聿水囑。

去歲與硯頗有緣。劇目鉅心賦六篇。冥搜今奈腹笥盡。苦吟難得筆如椽。星精落地凝餘魄。石質紫潤發天液。

著書誰趁羅江東。琢玉豈輸李元伯。昔聞先儒有拙堂。每獲遺篇喜欲狂。海外異傳文氣壯。月瀨紀勝筆花香。更審出處增傾慕。通才轉被詞名誤。雕蟲篆刻皆緒餘。經世要在識時務。坤輿形勢堪長吁。誓爲家國致區區。殷憂方思履霜戒。勸農講兵見遠圖。已荷賢侯恩不淺。厭聞蓮幕榮軒冕。却聘書成決然歸。此心匪石何可轉。流澤在人輿誦喧。桃李春深花滿門。勢南文物冠寰宇。家絃戶誦風俗敦。聲譽遠出賴梁右。舉世仰望如山斗。訂謬析疑多發明。涵養淳蓄閱年久。優游林下晚節全。角巾野服癯於仙。翻恨吾生隔數紀。雲龍相逐終無緣。

君家嚴君懷奇質。從游恰當少年日。一自董帷拜賜來。瓣香北面每稱述。物之增價在得人。手澤依然古彩勻。睽離未幾旋遇合。鸚眼莫瞋歷轉輪。誰貌老師添此硯。可憐端石負深眷。定是蕭齋挑短檠。濡毫方池不知倦。憶昨游蹤在津城。郭北一路步晚晴。遙指平泉卉木密。斷橋流水澹煙橫。栖碧山房經浩劫。箕裘何人守舊業。烏衣巷口秋燕飛。野花滿地蝶魂怯。俯仰乾坤有餘哀。向秀賦裏鄰笛催。身後蒼涼竟如此。青山何處葬斯才。今夕君家爲觴詠。瓶梅噴香燈斜映。傳玩多時感不禁。及聞軼事更起敬。幹蠱君能拔時豪。好古作癖性孤高。

一日三摩笑相視。快于新買五尺刀。鯁生豈敢矜小技。寸心聊與前賢比。從來容易墨磨人。嗚呼硯歌可以止。

三月初一雪

三冬唯早曠。入春始見雪。六花白平鋪。陌上輪蹄絕。五情熱忽消。衆穢隨堙滅。須知天公意。幻出乾坤別。早起倚小欄。調飢怯寒徹。敕童沾濁醪。憐汝脚如鐵。昨被顧況嘲。桂玉何足說。鉅商事壟斷。其罪過草竊。晴日杲杲生。微煦春意泄。一枝亞階前。絕愛梅花潔。

初二舉女命名曰雪枝詩以紀之

多男素所願。十年有三子。玉勝與翠雞。忽入閨夢裏。山

妻向予言舉女却可喜。少小能慰情。生孫亦可俟。呱呱聲何嬌。坤柔自此始。衣褐寢地了。先生唯莞爾。不欲詠絮才。不要聽絃耳。木蘭莫替爺。緹縈莫爲婢。雖因眼前景。錫名有深旨。帶雪梅一枝。清操庶相比。

高橋月山招飲。同日下勺水。岡崎春石。

書堂同把臂。時事與君論。何管世情薄。居然吾道存。芸香四壁淨。花氣一牕昏。矧飽郇廚美。高歌倒綠尊。

久地看梅

東風一路酒旗斜。杖屐趁晴吟興賒。松塢竹林併入畫。綠嵐襯得白梅花。

驀地遙香脈脈通。滿村煙意白微濛。梅花固是如高士。一見遣人趨下風。

竹外斜枝最可人。疎花催放弄煙春。冰肌玉骨清如許。看到薄粧應始真。

梅花香裏鳥聲圓。澹宕春光二月天。絕似藍田日初暖。玲瓏萬玉欲生煙。

袖手低吟仔細看。濛濛花氣驟生寒。併教晴日催微暈。墜地香雲溼不乾。

隔竹雛鶯已好音。花前不許點塵侵。悄然消受午寒了。萬斛清香如水深。

可憐素艷媚新晴。無限詩愁到骨清。行盡花間路如綫。
出牆又有一枝橫。
的的花開女字枝。最嫌折取損芳姿。往來百匝銷魂極。
只要嫩香吹入詩。
數樹雪然花滿蹊。小園煙景午淒迷。柴門半掩春無主。
一任流鶯恰恰啼。
獨倚輕風襲野梅。萬花宛似爲吾開。得意詩成吟不歇。
停筇林下尙遲回。

玉川柳亭次伊東聿水詩韻

出郭值新霽。灑然塵事除。釣磯春水長。驛樹午煙疎。迂

路看梅過。孤懷借酒舒。前隄誰拾翠。草色映羅裾。

雨後春望

倚欄浩嘯撫春醪。眼見長安氣象豪。萬戶煙花當夕暗。
九重城闕插天高。縱令諸相職須罷。最怕至尊躬自勞。
酥雨纔晴殘照麗。陌頭車馬乍滔滔。

客中春夕

桂玉風塵事已非。南船北馬未言歸。晚春亭驛群花亂。
靜夜樓臺一笛飛。放眼劫餘人物盡。關心客裏信書稀。
家江應近香魚節。夢落年前舊釣磯。

春日言志

雨後春逾深。東風吹有色。晚花澹似人。當階一枝仄。遠林赴微暝。裊裊煙如織。鳴禽已無語。日入群動息。顧子墮塵網。胸宇久茅塞。矧乃人心危。世途多荆棘。孤眺與意會。靜中祛五惑。榮瘁皆同歸。元化抱其默。眼前久遺此。至理偶然得。茫茫覆載間。吾道良可識。

龍尾硯歌用坡公舊韻謝伊東聿水惠贖

蒯家贈遺不毫惜。此物在吾等。趙璧珍產來自芙蓉。谿溫潤寧遜端州石。彭奴侍婢捧立時。紅羅亭上寫新詞。瓜膚穀理兼澁滑。妙趣又被坡翁知。洗盡眼膩與心垢。几案增輝矜富有。揮翰可以試吾才。風流肯落二君後。

回首婺源隔海雲。料識轉移閱劫塵。表裏瑩潔無瑕類。依然當用如俊人。象管豹囊須簡擇。八法不屑遺點畫。從今與汝共周旋。終生相伴莫相別。

爲福田眉仙題其畫

郭熙論三遠。夏珪宗蒼勁。共作長江圖。後人多題詠。采石至夷陵。千里平如鏡。荆門扼峽口。初驚水勢盛。空舫連黃牛。新灘狀流迸。鐵棺崖腹懸。巫山雲氣淨。我愛眉仙畫。縱筆原真性。潑墨濃澹分。其中規度正。萬派爭渦旋。煙樹莽掩映。九原如可作。郭夏定起敬。長江圖卷於水湖長江。萬里碧瀾漫。於山攀峨眉。千仞翠嶺岷。蜀

棧攬佳景寧說行路難秦關不相讓煙霞任意餐古人
貴手法君與天機安今人重粉本君從實地看苟窮造
化祕何須心力殫生意尤精巧逸氣迸楮端有似張志
和舐筆墨未乾又繼李思訓通神良可嘆蜀中畫冊

近藤恬齋男爵廉平招飲席上初晤廉南湖泉賦此

呈二君

知名高士是南州設榻陳家意自優舉目蓬萊一清淺
關心滄海又橫流當筵酒氣微吹面薄夜花香悄入樓
乘興狂歌醉中發珊瑚敲碎蠟煙愁

白木太孺人七十壽詞集宋人詞句

二句一合圓
轉自如
收句絕妙
精神完足

剛道人生七十稀辛棄疾一杯重勸莫相違程垓當初不合輕

分散柳永脫了羅衣著苧衣黃易

將游芳山有作似同游大町桂月芳衛

驛路鶯花春日遲出門恰值雨晴時與君始遂平生願
要賦芳山第一詩

芳山紀游六首

下車芳野驛徑抵六田渡錦石何鮮明瀟瀟清流注登
岸循林麓旋踢盤陀路數株紅媚人風雨不敢妒長峰
花更饒左右勞瞻顧行行籟雲過延賞屢停步先皇廟
宇儼名臣咸配祔彷彿瞻龍袞伏臘禮如故懷古痛淚

多。又酌四郎墓。茲知名勝區。併存山河固。俯躬神欲蕩。
一壑漾香霧。積翠點綴工。花邊日暈照。山市萬瓦明。炊
煙出疎樹。投宿豈無緣。主客快良晤。飽飯氣力蘇。欣然
戒杖屨。欲隨東道人。領略煙霞趣。

寂寂行宮跡。林篁幽以邃。遺構無一存。萬感催雙淚。藏
王猶有堂。金碧耀淨地。神鬼所憑依。虛廊晝清闕。次詣
吉水祠。泉石看幽致。香臺歷劫餘。舊聞多軼事。御榻初
在茲。儼然擁神器。豫州與豐公。悲愉情各異。傍澗路透
迤。疎鐘出近寺。連山結層陰。貼地春雲膩。石霽微有聲。
風鐸入遠吹。一徑行欲窮。樵婦巖側避。遙指如意輪。粉

壁足標識。其上陵寢古。縹緲隔松翠。林深鳥不喧。瞻矚
方愜意。樹梢放夕暉。花態靜自媚。

尋幽入香界。躡磴向上方。一邱松檜鬱。玉魚土中藏。緬
懷延元際。賊勢何披猖。其禍君自取。南狩嗟倉皇。枉恃
河山險。蕭寺會冠裳。風雲天地慘。兵馬東西忙。遺詔劇
哀痛。臣子皆激昂。擬回虞淵日。先後作國殤。就中小楠
公。帝許股肱良。只期赴敵死。忠孝無他腸。此來拜辭了。
舉族趁戎行。熱血瀝青史。終古有耿光。今我陵下跪。悽
然愁思長。歲月駛如箭。人世多滄桑。旋看花飄雪。四山
歛斜陽。弔古隨所眷。稽首仍彷徨。

晚下幽香樓。溪山又移屐。偶過竹林院。園池猶如昔。路盡爽塏上。勝境眼前闢。野店青帘飄。句留欣賞客。隱隱何寺鐘。孤霞林巒隔。當欄數峰澹。遠思與煙積。歸禽飛不聲。曖曖天將夕。花氣一迷濛。斜陽爲之割。戀奇目無留。醉後欵巾幘。嘉辰與我私。乘興方暢適。矧携素心人。談笑情莫逆。有歌伸雅懷。幸免歸陳跡。坐久暝色深。嫩寒乍脈脈。高枝被風拗。花態倏變易。吟罷月初升。四面晶光射。恍然在瑤宮。依稀夜欲白。

駕言尋幽徑。欲窮翠微巔。萬花如出沐。林表紅日妍。縱目觀地勢。蒼茫遙慨牽。奔流作天塹。高原雲外懸。龍門嶄然秀。亂嶂相繚聯。當面豎屏障。方與阨塞便。高見劃東境。金剛聳西天。似張左右翼。有警烽燧傳。紀勢開要畧。時發萬里船。快帆挾風勢。容易通三邊。山民勇知方。誓將身命捐。矧又房宇裏。僧兵算數千。當其危急際。南竄地更偏。可自賀名生。以至十津川。三世五十載。耐久非偶然。臨眺多古意。植筇午晴前。

九折頻驚魂。筍輿度修嶺。高寒不是風。嵐霏罩午景。祠廟丹青落。頽殘經歲永。畫壁薜蘿縈。石爐苔蘚冷。澗壑氣蕭森。一徑闢榛梗。前峰羅翠屏。遵途得佳境。行公棲錫地。茆簷跡堪省。隔絕塵俗區。有似葛洪井。白雲晝自

陰四圍竹樹靜。閒花不知名。么紅弄妍靚。長飈一以拂。
林籟遙相警。清泉迸巖罅。手掬不用綆。都與心目謀。奇
趣固已領。微悟聊自頤。翛然煩慮屏。晚禽語樹杪。夕陽
斜移影。恁恍會真意。欲歸又矯頸。

芳山懷古

一自翠華辭紫霄。河山流峙閱三朝。可堪鐘梵招提境。
祇有櫻花伴寂寥。揮淚花前一嘯歌。南風不競竟如何。偷安忽墮中興業。
當日君王悔亦多。幾載僧居作闕庭。隔簾咫尺暮山青。愁聽一派潺湲水。

曾攬龍牀御夢醒

當初南狩劇匆匆。整頓乾坤未畢功。終古空山閱神鬼。
淒涼匹似永安宮。寺樓斜日磬聲幽。萬疊櫻雲盪古愁。返闕願虛陵土冷。
等閒白盡老烏頭。行宮跡在萬山陰。日月于今尙照臨。到底難埋千古恨。
晚風一徑落花深。關河莽莽暝煙生。鴉背斜陽一綫明。形勝依然成犄角。
金剛山色碧崢嶸。地覆天翻轉瞬看。無端變局又偏安。故宮銷盡金銀氣。

隔壑漆燈終夜寒
海內風塵歲月賒
諸公心血灑櫻花
和成神器歸無恙
至竟兩朝同一家
半壁南朝五十年
黯愁不盡古陵前
花開花落春如夢
明日青山哭杜鵑

芳山軼事延元南狩以外可傳者亦不少乃別成
十首

遠從鴉路度嶙峋
破竹西來士氣新
豈有群兇猶索戰
要知蟻蝨亦王臣
一曲神絃降素娥
名花入夢更如何
他時靖難仍依樣

冬語

楊

獨奈王家劫運多
青山留錫了前緣
遺躅空菴七百年
澗道餘寒花發晚
一袈裟地靜于禪
踏破千山雪作堆
艱危應憶母懷哀
名姬淚與忠臣血
潤色九郎終局來
千秋軼事有餘悲
地棘天荆話別時
但是妾心冰雪潔
何須伏劍傲虞姬
畿甸風雲指顧中
可憐龍種出英雄
他時折伏終無驗
閒却秦王曠世功
落日孤城最愴情
君恩既重一身輕
凜然正氣河山壯

留得全忠父子名

延元陵上鎖煙霏埋髻塚邊花亂飛絕筆依稀鏃痕古

雛僧指點舊龕扉也郎才女貌亦堪儔石爛海枯雙淚流刺盡心花甘入道

情天恨事又千秋

昨雨始晴花滿山當筵歌舞且開顏翻憐百戰頽齡後

纔得嬉春一日閒

中岡金峰清一見贈藏王堂古瓦酒間賦此道謝

藏王之堂高百尺依稀淨界繪金碧濁世且疑佛無靈

風打雨淋悲陳跡白鳳年中始建之役君法力傳神奇

文章行... 此名... 後... 前... 此... 第... 白... 結...

每遭災禍更增廣要與名山儼不移轉變何忍言吾懷
終難寫山長偶來過贈以一片瓦停杯撫罷話興亡無
限傷心淚盈把出塵穢經摩挲燈邊偏驚寶光多豈是
康正以後物巴樣刻文未銷磨汝若在元弘際應見帝
子英武駭一世銀鎧血迸箭七條從容決死氣逾厲勇
僧劍舞酒開顏却有忠臣代君斃汝若在正平初應見
賊騎奔騰犯帝居翠華搖搖又南狩幾多臺殿化荒墟
按轡唱出腸斷句君臣相顧頰歔歔龍漢歷劫皆焦土
汝亦不免修羅苦似有神靈為護持幸完形貌在寰宇
憾汝不能言眼前無由譚往古其質如石堅如金叩之

鏗爾作聲和我吟。便知瓠笙竹笛外。金輪寺舊傳後醍醐帝瓠笙兩管今藏於吉水祠賴山陽有芳野竹笛歌
興國鐵鈴同清音。山陽又有興國鐵鈴歌午夜山樓歌正罷。萬花欲霧月有陰。

初瀨

登陟從初地。長廊百九間。萬櫻花落盡。新綠欲埋山。
千年長谷寺。樓閣倚崔嵬。淨地留春住。牡丹紅欲開。

南都治春絕句

依然六代舊規模。隨處鶯花入畫圖。節過清明風日好。
山溫水軟勝西都。花外恍聽長樂鐘。醺人春色酒同濃。緬懷九陌三坊盛。

粉壁七重櫻八重

可憐采女贖荒祠。翠羽明璫憶妙姿。春水一匳瑩似鏡。
垂楊多事又描眉。

雨後放晴花滿蹊。朱甍碧瓦競高低。呦呦仙鹿如爲導。
春日祠前路不迷。

衫碧裙紅巫女嬌。傾鬟振袖欲魂銷。旋看欄角花如雪。
一殿神風奏鳳簫。

百轉流鶯弄故簧。衫前扇後趁春忙。東風取次花無賴。
二月堂連三月堂。

金銀佛寺爛然明。記得沙彌天子名。誰信紅羊頻歷劫。

慈雲悲雨滿平城

善男善女自成群。鐘語諸天日欲曛。瞻拜瞿曇大千相。

紫檀香裊妙鬘雲

梵唄聲中魚板催。夕陽金碧幾樓臺。香風四起寶壇淨。

莫是散花天女來

花外微風拂暝煙。一輪月上笠山巔。清光萬里今如昔。

記爲晁卿照別筵

一旬多雨又多風。嫩草山前春欲空。拾翠女兒情思甚。

傾筐併受落花紅

花信無端到紫藤。三山樹色綠層層。鵲愁和雨黃昏近。

啼血一聲何帝陵

笠置山

巨巖森笏立。峰勢何巖嵒。拔地千仞峻。居然抗泰嵩。一
水循其麓。灘響耳欲聾。形勝供扞禦。真意問化工。昔當
繁華日。樓觀定玲瓏。非有磴道設。攀援蘿無功。干戈記
元弘。四海正困窮。南柯入帝夢。草澤起英雄。三旬城初
陷。一炬帳殿空。天子嘆無家。畿甸路不通。其得廻龍馭。
乃憑諸將忠。如何寵獼猴。中興業未終。今我極絕頂。浩
歌向天風。百年若轉燭。感慨誰相同。可憐水精域。道氣
猶葱葱。高寒襲肌骨。立盡積嵐中。昨雨洗春去。新樹綠

作叢啼字疑鬼語。山花似血紅。白雲夕歸岫。奔泉迸巖
櫛木末斜照澹。暝色四濛濛。

笠置似吉田學軒增藏

與君如舊識。聯屐試吟行。勝地何嫌險。高歌好遣情。山
深蒸石氣。樹密逗鶯聲。絕頂飛觴罷。關河夕照明。

岐蘇

雨後遙巒掃翠嵐。溪行一路舊相諧。紅紅白白錯如繡。
四月岐蘇花正酣。

悼亡十首集唐宋人詞句。唁土屋琴坡。

茶甌香篆小簾櫳。辛棄疾都與年時舊意同。晏幾道憔悴不知緣

底事閻選綵雲飛盡楚天空。趙長卿

擬將幽怨寫香箋。杜安世一別音塵兩杳然。石孝友老去風情應

不到歐陽修花能笑語柳能眠。向子諲

可憐蝴蝶易分飛。晏幾道燕子猶知社後歸。劉克莊望欲斷時腸

已斷歐陽修天風搖曳六銖衣。柳永

斷盡危腸銷盡魂。賀鑄凭欄半日獨無言。李煜看看又是黃

昏也。周密雨打梨花深閉門。秦觀

枝上流鶯和淚聞。秦觀空庭春草綠如裙。吳文英那堪往事思

量遍杜安世別緒多於雨後雲。周邦彥

一簪華髮為誰新。李元儀長記樓中粉淚人。晏幾道惆悵落花風

不定歐陽修杜鵑只解怨殘春周密

夢繞陽臺寂寞回向子諲百年心事老相催呂本中牡丹一夜經

微雨溫庭筠肯為人愁便不開葛勝仲

風前月底奈愁何失名細似輕絲渺似波歐陽修霜鬢不堪春

點檢葉夢得散花猶記病維摩程垓

老來又失少時歡黃庭堅明月樓高空畫欄蔡伸舊事慙慙休

忘了毛滂雲鬢玉臂共清寒張孝祥

殘燈明滅枕頭欹范仲淹相見無因夢見之黃庭堅天上人間何

處去張曙却愁彌勒下生遲蘇軾

字都宮敬風常松古稀壽言集唐四句

如今七十自忘機柳宗元故著尋常澹泊衣張籍莫向尊前惜

沈醉韋莊百般紅紫鬪芳菲韓愈

暮春江村

雨後桃花盡煙晴午景澹垂楊雙渚合新水半篙增鷗

鳥去隨艇鱖魚初上罾行吟曳筇過沙岸似西興

南園

雨痕乾盡午風微一片晚花飄點衣看到牡丹紅欲拆

蝶魂應未怨春歸

自笑軒雅集贈字都宮敬風次勝島仙坡韻

花後情懷澹高人亦解襟斯筵不違約一笑恰同心謝

老邱園靜。憂時歲月深。流譽因行誼。季世見盧欽。

初夏

茶煙縷縷出簾斜。嫩綠重重經雨加。四月園林疑有雪。籬邊開遍繡毬花。

石壽山人

汪錄

百美名印譜題辭爲伊東聿水

石壽山人鐵筆妙。到頭絕技誰同調。玲瓏小印顆顆奇。凹白凸朱爛相照。麗才已軼梁大年。佳人名字任意鐫。譜中恍見百美面。太勝金屋貯嬋娟。宣和印史莫株守。雕蟲訛誤閱年久。博洽近推飛鴻堂。古法猶待補天手。不怪同宗出若人。螭匾夙得徐家真。媚嫵纖巧一掃盡。

文明續密方通神。例以精誠致魂魄。多事休問鴻都客。艷骨雖朽艷名存。瑞鵲靈龜儼有跡。

江亭矚日限韻同伊東聿水岡野楓林

橫塘春盡草萋萋。雨氣瀟天波拍堤。竹樹迴環村遠近。綠嵐欲暝一鷗啼。

平楚蒼然夕照移。煙中樹色墨離離。蘋風輕剪浪花起。細雨一川潮上時。

江水彎環碧似油。雙鳧故傍釣人舟。分明平遠郭熙畫。數筆雲山林未幽。

同阪茅田池邊藤園游大宮公園

麥秋天未熟。聯襪步遲遲。水木開清境。丹青繪古祠。鵲聲隔林急。蝶影傍花移。日午薰風度。林端颭酒旗。

奧山竹香見贈櫻桃媵以短古一章次韻道謝

綠陰門巷槐夏天。朱櫻上市如蠟丸。此時顆顆貴於玉。安得飽食興闌珊。豈圖遠贈從羽北。到手封裹猶儼然。賴有鐵軌能縮地。兩日遞傳千里遷。道是山園所手摘。翠籠滿貯勻以圓。移上銀盤莫觸破。緗葉爲藉紅更鮮。一笑右丞矜得意。芙蓉闕下陪御筵。服罷便合好顏色。不啻幽窓解餘醺。何以報之歌宛轉。渺渺予懷思美人。

同福井學圃游蒲田菖蒲園

爲愛園池景。乘閒郭外尋。菖蒲千頃淨。楊柳一亭深。聯屐旣多樂。拂衣仍縱吟。梅天何惜霽。微雨又霑襟。

斷梅

昨夜輕雷報斷梅。新晴莫怪暑威催。北窓高枕從茲始。誦罷陶詩睡一回。

梅天穩自雨中過。紅日當簾鳥語和。滿砌苔花作鬢細。一池荷葉疊錢多。不衫不履情懷好。無事無憂身世輕。午夢初回移小榻。蕉天苔地有餘清。

初夏却疑三伏同。新蟬嘶出綠濛濛。薄衫不用蒲葵扇。

快受槐陰四面風。

倦繡無言晝漏長。棗花庭院又斜陽。褪紅衫子流黃篋。

準擬西牕試晚涼。

午睡醒來詩興加。敕童先試一甌茶。微風徐盪簾波白。

滿院吹薰梔子花。

浴餘倚檻欲斜暉。且喜涼風入葛衣。一樹晚榴花吐火。

白蛾如鳥傍檐飛。

小松霞南綠招飲星岡茶寮酒間賦似。

把臂高樓上。軼才今見君。浮生幾歌哭。絕域尙風雲。帶

雨蘚痕淨。盪涼簾影分。酣來一尊酒。翦燭細論文。

登樓觀海

處苦乃思樂。值熱乃思涼。非有快心事。浮生鬢其蒼。玆
來倚樓檻。長風吹我裳。十萬八千頃。海水何湯湯。曠望
無涯岸。一碧接混茫。了了鏡中影。白帆鷗同翔。旋看瀾
色紫。漾漾涵斜陽。蜃氣所搖曳。蓬萊如可航。舒嘯興轉
王。勝舉河朔觴。來日隨漁父。鼓枻唱滄浪。

小酌聽雨

酒味清於茶味清。嫩涼吹入燭華明。梧桐葉亂芭蕉颯。
一雨平分兩樣聲。

廉南湖見貽近著東游草乃題其後併道謝。

疇昔琴尊畔。荷衣韻欲仙。傾心話今古。把臂了因緣。唱
和才尤慧。推敲句更圓。旋勞彩鸞筆。白雪儘流傳。
風雲九州暗。西顧淚潸潸。避亂秦公緒。傷心瘦子山。滿
囊詩自富。千里客仍閒。蓬島尋仙跡。淹留久不還。

次韻送福井學圃游山形

明發羽州去。飈輪疑度空。交游重北郭。冠服擬南宮。卅
里河聲壯。四圍山色同。靈泉別開境。煙靄似春融。

寄李幼安

不見李生久。相思朝夕催。沈涵矜學殖。閱歷長詞才。青
史留名好。紅羊換劫哀。何時談笑劇。傾盡酒千杯。

山中

二二三條瀑布。五六圍松樹。鞋底白雲生。蒼崖欲有路。

獲岡野楓林杭州書賦寄

曲院紅荷開。憑欄看夕曛。煙生葛仙井。草長岳王墳。禍
亂又今日。湖山多軼聞。詩成勿高詠。極目變風雲。

寄伊東聿水

兼旬寡良晤。夢到畫堂前。婚世慙吾拙。乘時覺汝賢。林
聲雜蟬語。簾影盪茶煙。暇日吟堪續。涼生揮筆天。

水竹雲山房小集限韻同聿水楓林

新涼宜小酌。簾幙有餘清。砌竹風成陣。盆荷花幾莖。游

蹤互南北詞筆要縱橫。時事變何極。醉中愁又生。
將游霞浦有作

江水通湖水。蘋香渺入秋。煙波涵舊國。天地等虛舟。無
病仍垂老。餘閒可縱游。行當鱸美處。詩酒便淹留。

西浦舟中

一雨驟過沙樹孤。絕奇只許郭熙摹。黃濤白晝魚龍變。
天淡雲開雁鷺呼。半日陰晴添氣色。終生心跡託江湖。
拂衣領得扁舟興。咫尺滄洲可到無。

萬松園

爽塏宜遙矚。萬松圍一園。了然嵐氣襯。不聽市聲喧。歸

秋水蘆花

鵬渚汀隔斜陽煙水昏。勝區任人過。地主雅懷存。

北浦泛舟看月時陰曆七月既望也

鼓浦東去北浦濶。雨後山色如墨潑。殘霞猶染魚尾頰。
西風起自青蘋末。快受涼氣吹上襟。雙槳盪破煙水深。
蒹葭蒼蒼一汀暝。秋入眠鷗睡鷺心。須臾圓月當空挂。
碧雲一片妍于畫。清光瑩徹辨纖毫。彷彿水府照靈怪。
漁郎相見短笛橫。一吹便成裂石聲。君山老父堪可擬。
曲半怕變蟾影明。紅露碧筒笑傾酒。醉餘扣舷吟嘯久。
獨喜江湖漂泊身。免與風光輒孤負。坡公千古傳妙辭。
扁舟赤壁興酣時。高懷渾忘遷謫苦。風流灑落亦吾師。

明月遍觀今古了。問之不答空悄悄。毘陵一去魂難招。
目斷紫霄瑤闕杳。三更四更宵已殘。玻璃世界忽生寒。
仙愁縹緲何處盡。魚龍得氣起微瀾。野火依稀連水驛。
鹿洲祠樹澹煙隔。風露蕭蕭溼苧衣。河漢西流匹練白。
幽賞未畢客心孤。維舟岸頭尙踟躕。仰看高高青天頂。
依然明月如可呼。

湖上雜吟十首

露滴蓼花紅未乾。一灣漲碧欲生瀾。曉煙忽被風吹捲。
隔岸青山歷歷看。
菱陂芡浦水潏洄。滿目湖山霽日開。廿載重尋薄游跡。

舊知鷗鷺莫相猜

秋聲昨夜亂青蘆。秋水今朝碧滿湖。玉膾金齏思一醉。
可無漁婦餉新鱸。

廻汀曲港棹歌還。沙樹相連不見山。盡日水蘋花氣裏。

一雙白鳥與吾閒。

倒空碧浸玉琉璃。看到黃昏暝色移。雨氣和煙低貼水。

鯉魚風裏疊漣漪。

湖天雨過水平隄。樹影如山晚更迷。驚起鴨群飛四散。

一聲菱唱浦雲西。

津亭沽酒坐新涼。魚氣漾波煙水長。絕愛上番風味好。

芹羹菰飯滿匙香

南飛烏鵲不成群。玉宇月高無片雲。笛處扁舟歌處榭。

夜涼如水恰平分。

魚龍寂寂水泠泠。一片溼雲籠遠汀。涼入菰蒲風影綠。

篝燈明滅小於螢。

湖光黯澹月依微。露白葭蒼秋滿衣。遠水生煙艣聲絕。

柳邊人語夜漁歸。

鹿島祠

維昔鴻荒世。草木方榛榛。文身椎髻者。野性不可馴。天
祖御天久。六合歸其仁。乃敕武甕槌。膺懲作新民。風雲

仗斧鉞。勇武絕匹倫。八洲咸懾服。撫字刑賞均。筆路啓
山林。志慮極忠純。茲當開國日。儼爲佐命臣。威風靡千
里。遠覃東海濱。要荒霑王化。蝦夷自逡巡。子孫纘緒業。
經略偏苦辛。精爽滿宇宙。何年此烝禋。龍池泉流瀉。筮
山松靄勻。秀靈之所鍾。萬古猶有神。仙樂翻南呂。寶鏡
對北辰。祠廟丹碧壯。伏臘牲牢陳。王師昨航海。貔虎氣
益振。烏丸室韋外。長驅捲戰塵。冥護豈無驗。討暴貴能
因。食漿爭載道。仰瞻旭旗新。

藤原鎌足宅址

儒冠當日氣峻嶒。整頓乾坤功可矜。文物昭回推大化。

君臣遇合記中興。椒蘭累世自專寵。鸕鷀一門時結朋。忍見空桑經浩劫。西風亂草滿陂塍。

稻荷岡晚眺

孤鶩落霞天盡頭。筑波山色入新秋。稻花香裏涼風度。一水彎環十六洲。

潮來曲二十四首

潮來之名始見和名抄。當時賽三社者。舟行必過此。近世東北漕運。自銚港溯刀水而抵江戶。此地位其中間。儼爲一水驛。臨江數百千家。中多妓館。估客倡婦。日夕相聚遊戲。世或比諸古之江口神埼。旣而水

路屢變。商旅不由。妓館亦隨滅。今猶存舊態者。僅一二字耳。宮本窪谷關戶石田四姓。自古稱邑右族。元祿中。宮本氏富累鉅萬。嘗購筑前米十八艘。自大阪運之江戶。窪谷氏亦不相讓。而好名殊甚。至舉江戶市中紅氈買之。宮本氏後出篁村。茶村昆仲。共有儒名。茶村受知于水戶烈公。周旋甚力。晚年隱居。事著述。撰常陸史料若干卷。就中關城繹史一書。最行於世。近時關戶氏有香渚者。聲譽蓋與茶村相若。其歿後。無復顯者。予游潮來館於關戶氏。太孺人詳說。今古其言。娓娓可聽。所謂潮來曲者。卽本地妓流所歌。

元享間傳播海內南郭服氏譯以韻語其體摹齊梁
艷詞蔚然深秀實爲集中鉅製次之雲山鼎甫詩佛
星巖輩皆有竹枝之作終不相及予乃倣南郭蟹采
俚歌翻之且補入數首庶幾土風之變可以概見也
霞浦連刀水潮來是要津煙花三月麗留住峭帆人
天末雙峰峙宛然夫與妻終朝共鑒影江水似玻璃
江干往又還柳條斜拂岸誰知方寸心紛糾如絲亂
歡超東海來早晚發仙臺風潮幸有信能遣妾懷開
種桐得梧子種藕采蓮子油盡燈亦殘生憎啼鴉起
新柳性何婉萬縷裊於絲勿狃午風暖恐被晚風吹

明發歡又去應值江都春花艷人輕薄淹留莫踰旬
斜陽古渡頭有個垂楊樹只解舞風前不繫歡舟住
死生一契濶忽忽歲月馳鹿島石根固儂心亦不移
薰風自南至水國雨初晴可憐菰蒲裏燕子花輕盈
鶻聲急相過潮漲一江渾悄立橫塘上石闕終不言
儂心說向誰孤坐洞房裏蟬聲咽不休螢火焚身死
相思一紙書和淚墨無色今朝誤遺之怕爲阿妹得
銚港日繁華賺歡心如醉莫詫新花妍舊花有情思
欲寫胸中思一路到江頭遠山含雨氣替儂繪暮愁
花月等閒度雁魚闕音塵再會在何日日禱鹿島神

露氣橫江白。秋涼透肌骨。仰看玉宇高。背人拜新月。
莫是鴛鴦與。羽毛文彩著。兩兩不相離。宿在波穩處。
歸舟寒若何。江天斜月落。一領新裁衣。慙慙假郎著。
賣笑立門前。妾身誰愛惜。一自經染濡。練絲不復白。
有約終不睡。四更起倚欄。歡如初三月。薄夜一相看。
漕運何由梗。百年江路遷。繁華歸逝水。煙月淒可憐。
少女工盪舟。橫截江波綠。宛轉歌太長。倚橈顏如玉。
潮來詞何艷。木石心亦降。不怪流傳久。譜入京妓腔。

月夜溯刀江

細草微風兩岸秋。三更扶醉上歸舟。渺茫江水和煙白。

舵尾金波碎月流

江心時有巨魚跳。百里舟行快趁潮。篷底臥看河漢轉。
滿天露氣夜蕭蕭。

蘆荻西風颯有聲。水長天濶月斜明。薄煙低岸看消盡。
一帶遙山作曉晴。

維舟便覺旅愁空。小立白蘋花外風。潑眼秋光初日霽。
臥波橋影麗于虹。

問月

碧雲淨。明月來。顯氣滿寥廓。清光萬里開。星影參差漢
影澹。浩歌倚欄酌金壘。吾懷與秋比瑩潔。白銀世界無

點埃嫦娥奔月談何易周生取月不須猜月是古人遺
愛依然天上徘徊盈虧所由悲歡迭催我今停盃問明
月古人蹤跡何如哉古人之心何如哉

殘荷

紅衣飄落後滿目奈愁何一鷺不離岸有魚猶戲波湖
雲祠樹遠秋水夕陽多蓮子誰貪得佳人已罷歌

中秋鮫洲賞月偕榴社諸同人席上分韻

海嶠高懸月清輝照醉顏潮來亭樹下秋滿水雲間勝
宴頻稱快老天終不慳魚龍欲飛舞嘯詠半宵閒

次韻送佐藤六石游北海

隨處期高興出門秋正中清才趁潘陸通性軼淡濛海
嶽若相待游娛誰與同但愁濤勢惡月暈又天風

偕樂園賦似金枝小峴

雅筵同祭硯一醉共披襟雨氣當簾冷燈華傍壁深知
君非玩物笑我每耽吟歸臥應猶早江湖有賞音

錦水樓次韻勝島仙坡賦似土居香國

縱目南樓晚尊前續舊歡雁程千里濶魚氣一江寒唱
和求才易文章報國難吾曹誓努力詩海挽頽瀾

秋夜江上限制韻

銀河一道劃天斜瀉作江波浸月華半夜涼風香不斷

水心魚躍碎蘋花

鷗社大會席上限韻

白酒黃花秋欲殘。遙憐窮髮鐵衣寒。明年此會應頒得。
玉帛塗山萬國歡。

密教發達志題辭爲大村歸堂

西崖

如是我聞佛說繁。究竟覺道歸一元。慈雲悲雨遍寰宇。
三界教主仰世尊。上座大衆分兩部。當初親睦無異言。
妙香隨處蓮花湧。梵唄相和貝葉翻。一自大乘創新義。
二十餘部群口喧。末世乃有密教出。儀軌儼然別開門。
南天鐵塔談何妄。漫稱龍猛傳統存。粗同老莊流爲道。

滔滔愚俗頻競奔。唐代龍象多英傑。就中不空才超絕。
魚紅鼈黑日邊舟。旋向故國探真訣。苦心不啻翻經功。
修法容易賊氛滅。偉哉寵恩集一身。汗青終古想餘烈。
教相收在曼陀羅。理觀尙借台賢說。白毫光滿內道場。
御香煙颺雲蓋結。一夜罡風吹九重。含元殿角鴟吻缺。
眼前衰運挽難回。蘭菊送秋盡摧折。獨有東瀛風氣殊。
當時平安初奠都。空海圓仁求法返。善巧方便輔皇謨。
金剛胎藏正傳在。東台兩密可竝驅。高野山高叡嶽峻。
金碧樓臺開畫圖。卽身成佛期疾證。釋尊大日同一軀。
息災增益資勸化。灌頂授法看規模。一彈指頃倏千載。

血脈綿綿終不渝。燁燁光華嗟盛矣。集大成者在茲乎。
我友西崖曠世儔。篤意嗜古性廉慎。雕塑夙慕楊惠之。
經營慘澹技日進。欲該衆藝審變遷。鑒裁往蹟取其信。
忽拋刀鑿從鉛槧。枕藉群書細問訊。乃悟根柢深相因。
眞言教旨逾潛潤。析疑乞益謁高僧。矧是奉佛自童齒。
讀破藏經卷幾千。蕭齋夜闌燭華燼。猶恐歲月不待人。
鏡裏新霜點雙鬢。記得疇昔相逢時。一見如舊肝膽披。
又識丈人眞且厚。當筵朗誦稱我詩。我於繪事無所解。
曾喜君書有餘師。傾葢訂交從此始。日夕竊期報君知。
車聲隆隆高軒過。手示新著索題辭。龐眉書客非年少。

每輸臣叔終不癡。我於妙法亦懵懵。鈍根居然發願遲。
最怕佛頭誤著糞。何須吹毛更求疵。內外兩典供驅使。
往往會心覈至理。一氣呵成廿萬言。要之辭達而已矣。
論議持平褒貶公。表彰前賢且隨喜。切戒一知半解徒。
莫與佛敵同一視。回首五天閱滄桑。破塔樓魔林莽裏。
禹貢山川流血頻。古堡燐聚鬼聲起。此教長在我邦尊。
金甌無缺兩相比。著書便了清淨緣。嗚呼西崖善男子。
土居香國招飲諸同人。于鷗夢樓席上次見似詩。
韻集宋人詞句得四首。

舊游册府記當年。

張元幹

結得清涼世界緣。

高觀國

夜飲東坡醒。

復醉蘇軾月華為地酒為川趙彥

菊花人貌自年年蘇軾紙帳薰爐結勝緣石孝友為愛琉璃三

萬頃辛棄疾畫屏細展小山川林安世

袖手低徊避少年賀鑄相從一醉是前緣蘇軾雲臺麟閣俱

陳跡陸游何日風流葛稚川張輯

一洗閒愁十五年蘇軾憑君莫唱短因緣蘇軾靜聽三弄霓

裳罷高觀國後夜相思月滿川張孝祥

輓福井學圃

急雨打敗荷。闌風擺衰柳。當此彫耗辰。喪我莫逆友。張
湛本聖童。天成才力厚。出入名公門。錐股誰相偶。中年

候柱下。冷官結無綬。倚相熟典墳。蘊蓄已經久。誓起大

雅衰。寸心存抱負。五言築長城。隻字希不朽。一自接履

綦。講說欣善誘。携手趁幽期。蹤跡堪回首。鶯谿每聯句。

湘樓時對酒。賞月芝浦湄。值春玉筍阜。勞魔奈難驅。一

朝倏離垢。精魂之所留。鄉是無何有。憶昨悼秦七謂竹磎矧

今哭黃九。我心劇傷悲。如失左右手。燭淚堂上流。陰蟲

咽幽藪。風雨夜更淒。新寒迫虛牖。

十一月初二送學圃葬于護國寺

死別便吞聲。與君如弟兄。江湖一尊酒。翰墨卅年名。叢
菊為誰發。斷鴻祇自驚。遙遙帝之所。直趁赤虬行。

魯山操

朝鮮端宗爲叔父首陽大君所逼遜位稱魯山君未幾六臣就戮王亦被縊殺予曩修韓史至此擱筆太息者三王在寧越賦短句國人傳誦無不涕泣云今觀其詞凡鄙不足言乃別作一首命曰魯山操子規啼聲何苦煙已暝天欲雨嘉木陰成韶光無主冤血灑作花明日紅滿塢江山萬里非吾土皇穹在上臣過誰補

庭中矚日

十畝庭中楓樹林秋陽欲午嘒幽禽紅乾黃潤妍相異

看取霜痕有淺深

從軍行

殺氣低窮髮迢迢萬里行黃沙追馬影黑月帶鴻聲久矣衽金革決然忘死生要臬可汗首日下頌昇平

西郊秋興

眼前時局易銷魂起向東天拜紫閣例有金吾嚴御陌又聞鐵騎鎮邊藩數家雞犬炊煙少一郡荆榛落照昏袞袞諸公成底事風雲頻變此乾坤

輓多田東燕

好問

秋後宸哀劇無端一鑑亡其人通典故餘事及辭章楓

葉落如雨。菊花寒帶霜。鴻儀記疇昔。援筆共商量。君曩與子同參于大

輓前田默鳳圓

道人終不默。四海姓名揚。閱歷奇無比。風流老更狂。刊書鮑廷博。賣字董其昌。鳳去青霄杳。楣間賸墨香。君嘗書秋碧吟廬匾

飯塚米雨辰雄見貽畫石一幅賦此為謝

一堆坼碧雲氣鬱。醜而文者看髣髴。女媧補天祖龍鞭。功過由人不在物。君今畫石筆何奇。我亦如石心不移。須締石上三生約。便是平泉酒醒時。

田中暢園保乞予詩乃書此為贈

抗志仍隨俗。家聲世所推。風簷朝展卷。竹院夜圍棋。致性橐駝在。治生猗頓宜。暢園花發日。一笑共傾卮。

水竹雲山房小集限韻同聿水楓林

雖賸三秋恨。醉吟茲作歡。捲林風淅瀝。環屋竹檀欒。誰謂原思病。而過范叔寒。窮通無定止。廿載滯長安。

雙魚閣酒間賦似高橋月山

海樓把酒倚雕欄。俯仰乾坤胸宇寬。義戰早添新版籍。危邦始卸舊衣冠。無關心事何辭醉。有得意詩聊盡歡。半夜魚龍眠正穩。篝燈數點漾微瀾。

對酒憶故人

昔與故人高樓醉。玉山欲頽風神異。今日故人去成仙。忍尋黃壚風流地。我有萬古憂。傷春未盡又悲秋。逝者不歸乃如此。日夜滔滔水東流。水東流。幾千里。兩岸蒹葭露爲霜。笛聲吹斷暮寒裏。故人兮故人。不知上玉樓。今朝玉晨有酒須澆趙州土。有淚須灑楚江濱。尊前歌闕又矯頸。天風洒掃雲路永。三更月照采石磯。恍看故人騎鯨影。

高橋午山

範

過訪喜賦

奇才羽北豪。把臂喜逢遭。永夜宜清話。貧廚有濁醪。青

囊技亦絕。白雪調何高。他日相攜去。重溟釣六鰲。

極月旬一雪

亂霰彈屋瓦。繼以風中雪。薄午到深宵。沙沙響不絕。天河洗兵餘。高寒冰花結。禊氛一時消。乾坤看瑩潔。夜鐘凍無聲。燭華隨暈滅。僵臥擬袁安。布衾冷如鐵。啼鳥已先晨。晴暉爛照徹。蠟梅黃未勻。山茶紅作纈。年豐瑞遽臻。來日邀淑節。只願穀價平。補我謀生拙。

早梅

何來花氣入風幽。破臘妝成似帶羞。林下竹牆三尺短。門前溪水一彎流。冰魂雪魄商量夢。月地雲階整頓愁。

好被綠衣童子伴。中宵恍惚到羅浮。

史閣部遺硯歌謝加藤拓川惠貺

玲瓏片石墨暈深。香生九竅之文心。以上翻用銘意紫潤明知端
谿產。妙品固軼渤海金。閣部遺愛世無匹。背鐫銘辭亦
奇逸。其末署名且紀年。崇禎辛未六月吉。當時九州尙
晏如。是公登第解褐初。硯兮定應侍座右。衙齋翦燭檢
簿書。一朝關西烽火起。滿地長蛇與封豕。煤山落日煙
塵黃。狼藉屍填太液水。北來胡騎遍中原。幾人誓死報
國恩。傷哉揚州笛腔裂。梅嶺衣冠點血痕。知君好古純
成性。曩示拓本索題詠。琳腴乃充潤筆資。驚見寶光四

輝映。物換星移三百年。神鬼呵護汝獨全。磨而不磷長
落落。嗚呼公節與石堅。

鳳咮硯歌疊坡公龍尾硯歌韻賦謝伊東聿水

龍焙山靈苦愛惜。黯澹谿水洗蒼璧。翔鳳下飲濡其咮。
扣之錚錚不類石。從來古質難入時。坡公作銘放厥辭。
黃琮白琥比珍貴。聲價初被天下知。吾構小園擬離垢。
書屋吟牀略備有。佳硯今復添一枚。坐令龍尾羞牛後。
句坡博山蕪香裊於雲。明牕淨几無點塵。不羨繁華五侯
富。贈遺每憑素心人。嗜古如君善攷擇。又同方生懷良
畫。硯歌賦到第十篇。腹藁羞少用意別。

華燭詞為四弟壽作

青鳥傳書雁奠成。氤氳簿上締佳盟。曾探吾妹金環否。

一種清標菊作名。

新人與亡妹同名

窺簾一朵早梅幽。入夜華堂喜氣浮。明月前身自端正。

袖長又解掩嬌羞。

絕勝秦樓引彩鸞。今宵綺宴了新歡。同心偕老莫相負。

祇有閨中花鳥闌。

魚水相逢是夙因。新居只好伴新人。畫眉聲裏夢初醒。

恰有梅花妝點春。

伉儷情深不諱私。妝樓日暮捲簾時。慙慙似向張郎教。

初月彎彎巧畫眉

四續十臺懷古詩

九州一劃判華夷。涿鹿歸來聲教熙。登極當年旌土德。

趨廷百辟紀雲師。蒼黃牲玉饗神罷。黼黻文章修禮宜。

臺上應龍今不見。雪花如席北風吹。

軒轅臺

烏鵲雙飛避鳳凰。饑春風雨漫相狂。深宮應有房中樂。

賤妾寧輸陌上桑。遺蹟欲傳臺已廢。貞魂不返骨猶香。

無情還是鍾情極。莫與殘花怨宋玉。

青陵臺

故宮碣石跡茫然。駐馬低徊萬感牽。不似黃金懇招士。

何由青簡誤希仙。薊丘草木秋風急。渤海波濤夜月圓。

看到秦碑又塵土。滄桑劫後幾經年。

求仙臺

當筵琴罷枉為歡。斷臂纍然血滿盤。莫怪時危求客急。

祇愁國小報讐難。煙塵悵望咸陽遠。臺殿平臨易水寒。

畢竟荆卿終自誤。忍將失計責燕丹。

華陽臺

六國初平法令新。祖龍出自虎狼秦。副車一擊笑孺子。

連弩餘威驚海神。巡狩頌功徒有石。山川禱病豈無人。

鮑魚亂臭西歸晚。容易驪宮又劫塵。

沙丘臺

潯陽弔古射蛟臺。絕壁高欹濤勢頽。千里游觀停逸足。

一時興會見雄才。魚龍移宅舳艫穩。溟渤連天日月迴。

縹緲神山日空斷。昆明昨獲劫餘灰。

射蛟臺

誰憐堯母既無門。香盡雲陽草木繁。且為嘉祥傳偉業。

不因殊寵假私恩。藏鉤戲罷分曹去。負辰圖成少子尊。

咫尺甘泉斜照裏。啾啾青雀似呼冤。

通靈臺

射場遺鏃倩誰求。軼事于今作話頭。四海風雲經百戰。

一門才藝足千秋。渚清沙白濡江水。煙滅灰飛赤壁舟。

都與銅臺同寂寞。黃蒿滿地夕陽愁。

教弩臺

杳然楚色帶殘雲。臺下西風酒不醺。真個誠心動天地。

儘教與國託功勳。偏安帝業三分決。千里樓船一炬焚。

今夜黃州月如夢。橫江有鶴數聲聞。

拜風臺

煙水茫茫似具區。依然金碧擁浮圖。中流舟過艣痕合。

古洞龍歸雲氣俱。夢裏興亡悲六代。眼前形勝控三吳。
倚欄獨自吹簫罷。半夜潮生明月孤。妙高臺

輓山田寒山潤

道骨自峻嶒。前身雲水僧。市中棲大隱。老後詫多能。
瀆頻移棹。寒山再揭燈。幽魂招不得。霜月一天澂。
除夕前二日。水竹雲山房。小集限韻賦似聿水。
唱酬同調在。詩品憶鍾嶸。霜氣警宵重。鬢毛隨歲更名。
山幾聯屐。丈室每分檠。痛飲遺塵世。敢輸蓮社盟。

秋碧吟廬詩鈔卷六



大正十年七月二十一日印刷
大正十年七月二十五日發行

定價金貳圓

著作兼 久保 得 二
發行者 東京市外巢鴨町上駒込十三番地

印刷人 安田 德治 郎
東京市神田區表神保町壹番地

印刷所 健捷堂 印刷所
東京市神田區表神保町壹番地

發行所 隨 鷗 吟 社
東京市麻布區仲之町十一番地





